

ओं नमः परमात्मने, श्री महागणपतये नमः,

श्री गुरुभ्यो नमः

॥ हरिः ओं ॥

कृष्ण यजुर्वेदीय तैत्तिरीय संहिता

पद पाठः (वाक्य सहित)

प्रथमकाण्डे पञ्चमः प्रश्नः

Version Notes:

This is now the current Version 0.3 dated August 31, 2020.

1. This replaces the earlier version 0.2 dated June 30, 2020.
2. This version has been updated with the errors found and reported till Aug 15, 2020.
3. Required convention, style and presentation improvements or standardisations has been done wherever applicable.
4. In this Compilation the Samita Vaakyams have been suitably aligned, synchronised and refurbished in line with “Pada Paatam”.

Previous Versions

1st	Version Number	0.0 dated 30th April 2019
2nd	Version Number	0.1 dated 31st March 2020
3rd	Version Number	0.2 dated 30th June 2020

Table of Contents

1 कृष्ण यजुर्वेदीय तैत्तिरीय संहिता पद पाठे

प्रथमंकाण्डं 5

1.5 प्रथमकाण्डेपञ्चमः प्रश्नः – पुनराधानं 5

ओं नमः परमात्मने, श्री महागणपतये नमः,

श्री गुरुभ्यो नमः ॥ हरिः ओं

1 कृष्ण यजुर्वेदीय तैत्तिरीय संहिता पद पाठे प्रथमंकाण्डं

1.5 प्रथमकाण्डेपञ्चमः प्रश्नः – पुनराधानं

TS 1.5.1.1

दे॒वा॒सु॒राः सँ॑य॒त्ता आ॒सन्ते दे॒वा वि॒ज॒य॒मु॒प॒य॒न्तो॒ऽग्नौ वा॒मं वँ॑सु सं
न्य॑द॒ध॒ते॒द॒मु॒ नो भ॑वि॒ष्य॒ति॒ यदि॑ नो जे॒ष्य॒न्ती॒ति॒ तद॑ग्नि॒र्न्य॑का॒म॒य॒त
ते॒नापा॑*क्रा॒म॒त् तद्दे॒वा वि॒जि॒त्या*व॒रु॒रु॒थ्स॒मा॒ना अ॒न्वा॒य॒न् तद॑स्य
सह॒साऽऽ*दि॒थ्स॒न्त॒ सोऽरो॑दी॒द्यद॑रो॒दी॒त् तद् रु॒द्रस्य॑ रु॒द्र॒त्वं

यँ॑दश्च॒शी॒य॒त॒ तद् – [] 1

TS 1.5.1.1 (Padam)

दे॒वा॒सु॒रा इति॑ दे॒व – अ॒सु॒राः । सँ॑य॒त्ता इति॑ सं – य॒त्ताः । आ॒स॒न् ।
ते । दे॒वाः । वि॒ज॒य॒मि॒ति॒ वि – ज॒य॒म् । उ॒प॒य॒न्त॒ इत्यु॑प – य॒न्तः ।
अ॒ग्नौ । वा॒म॒म् । व॒सु॒ । स॒म् । नी॒ति॒ । अ॒द॒ध॒त॒ । इ॒द॒म् । उ॒ । नः॒ ।

भ॒वि॒ष्य॒ति॒ । य॒दि॒ । नः॑ । जे॒ष्य॒न्ति॑ । इति॑ । तत् । अ॒ग्निः॑ । नीति॑ ।
अ॒क्राम॑यत् । तेन॑ । अ॒पेति॑ । अ॒क्राम॑त् । तत् । दे॒वाः ।
वि॒जित्ये॑ति वि – जि॒त्य॑ । अ॒वरु॑रु॒थ्समा॑ना इत्य॑व – रु॒रुथ्स॑मा॒नाः ।
अ॒न्वि॒ति॑ । आ॒यन् । तत् । अ॒स्य॑ । स॒हसा॑ । एति॑ । अ॒दि॒त्स॒न्त॑ ।
सः । अ॒रोदी॑त् । यत् । अ॒रोदी॑त् । तत् । रु॒द्रस्य॑ । रु॒द्रत्व॑मिति॑
रु॒द्र – त्वम् । यत् । अ॒श्रु॑ । अ॒शीय॑त् । तत् । 1 (50)

TS 1.5.1.2

र॒ज॒त॑ꣳ हिर॑ण्यम॒भवत्॑ तस्मा॑द् र॒ज॒त॑ꣳ हिर॑ण्य-म॒दक्षि॑ण्य-म॒श्रुज॑ꣳ
हि॒ यो ब॒र्हिषि॑ द॒दाति॑ पु॒राऽस्य॑ सँव॑त्स॒राद् गृ॑हे रु॒दन्ति॑ तस्मा॑द्-
ब॒र्हिषि॑ न दे॒यꣳ सौऽग्नि॑रब्रवीद् भा॒ग्यसा॑न्यथ॒ व इ॒दमि॑ति पु॒नरा॑धेयं
ते के॒वल॑मि॒त्यब्रु॑वन्-नृ॒द्धन्व॑त् खलु॒ स इत्य॑ब्रवी॒द्यो
म॒द्दे॒वत्य॑-म॒ग्नि-मा॒दधा॑ता इति॑ तं पू॒षाऽऽध॑त्ते तेन॑ – [] 2

TS 1.5.1.2 (Padam)

र॒ज॒त॑म् । हि॒र॒ण्य॑म् । अ॒भव॑त् । तस्मा॑त् । र॒ज॒त॑म् । हि॒र॒ण्य॑म् ।
अ॒दक्षि॑ण्यम् । अ॒श्रुज॑मि॒त्यश्रु॑ – जम् । हि॒ । यः । ब॒र्हिषि॑ ।
द॒दाति॑ । पु॒रा । अ॒स्य॑ । सँव॑त्स॒रादि॑ति सं – व॒त्स॒रात् ।

गृ॒हे । रु॒दन्ति॑ । तस्मा॑त् । ब॒र्हिषि॑ । न । दे॒यम् । सः । अ॒ग्निः ।
 अ॒ब्रवी॑त् । भा॒गी । अ॒सानि॑ । अथ॑ । वः । इ॒दम् । इति॑ ।
 पुन॑रा॒धेय॑मिति पुनः – आ॒धेय॑म् । ते । के॒वलम् । इति॑ । अ॒ब्रुव॑न् ।
 ऋ॒द्ध्नव॑त् । ख॒लु । सः । इति॑ । अ॒ब्रवी॑त् । यः । म॒द्दे॒वत्य॑मिति॑
 मत् – दे॒वत्य॑म् । अ॒ग्निम् । आ॒दधा॑ता इत्या॑ – दधा॑तै । इति॑ । तम् ।
 पू॒षा । एति॑ । अ॒धत्त॑ । तेन॑ । 2 (50)

TS 1.5.1.3

पू॒षाऽऽर्द्ध॑नोत् तस्मा॑त् पौ॒ष्णाः प॒शव॑ उच्यन्ते तं त्व॒ष्टाऽऽध॑त्त तेन॑
 त्व॒ष्टाऽऽर्द्ध॑नोत् तस्मा॑त् त्वा॒ष्ट्राः प॒शव॑ उच्यन्ते तं म॒नुरा॑ऽधत्त तेन॑
 म॒नुरार्द्ध॑नोत् तस्मा॑न्मान॒व्यः प्र॒जा उच्यन्ते॑ तं धा॒ताऽऽध॑त्त तेन॑
 धा॒ताऽऽर्द्ध॑नोत् सँव॑त्सरो वै धा॒ता तस्मा॑त् सँव॑त्सरं प्र॒जाः
 प॒शवोऽनु॑ प्र जा॒यन्ते॑ य ए॒वं पुन॑रा॒धेय॑स्यर्द्धिँ वे॒द – [] 3

TS 1.5.1.3 (Padam)

पू॒षा । आ॒र्द्ध॑नोत् । तस्मा॑त् । पौ॒ष्णाः । प॒शवः॑ । उच्य॑न्ते । तम् ।
 त्व॒ष्टा । एति॑ । अ॒धत्त॑ । तेन॑ । त्व॒ष्टा । आ॒र्द्ध॑नोत् । तस्मा॑त् । त्वा॒ष्ट्राः ।
 प॒शवः॑ । उच्य॑न्ते । तम् । म॒नुः । एति॑ । अ॒धत्त॑ । तेन॑ । म॒नुः ।

आ॒र्द्ध॒नो॒त् । तस्मा॑त् । मा॒न॒व्यः । प्र॒जा इति॑ प्र – जाः । उ॒च्यन्ते॑ ।
तम् । धा॒ता । ए॒ति । अ॒ध॒त्त । ते॒न । धा॒ता । आ॒र्द्ध॒नो॒त् । सँ॒व॒त्स॒र इति॑
सं – व॒त्स॒रः । वै । धा॒ता । तस्मा॑त् । सँ॒व॒त्स॒रमि॒ति सं॒-व॒त्स॒रम् ।
प्र॒जा इति॑ प्र॒-जाः । प॒श॒वः । अ॒नु । प्रे॒ति । जा॒यन्ते॑ ।
यः । ए॒वम् । पु॒न॒रा॒धे॒य॒स्येति॑ पु॒नः – आ॒धे॒य॒स्य । ऋ॒द्धि॒म् ।

वे॒द । 3 (50)

TS 1.5.1.4

ध॒नो॒त्ये॒व यो॑ऽस्यै॒वं ब॒न्धु॒तां वै॒द ब॒न्धु॒मा॒न् भ॒वति॑ भा॒ग॒धे॒यं वा
अ॒ग्नि॒रा॒हि॒त इ॒च्छ॒मा॒नः प्र॒जां प॒शून् य॒ज॒मा॒न॒स्यो॒प दो॒द्रा॒वो॒द्वा॒स्य पु॒न॒रा
द॒धी॒त भा॒ग॒धे॒ये॒नै॒वैन॑ꣳ स॒म॒र्द्ध॒य॒त्यथो॑ शा॒न्ति॒रे॒वा॒स्यै॒षा
पु॒न॒र्व॒स्वो॒रा॒द॒धी॒तै॒तद्वै॑ पु॒न॒रा॒धे॒य॒स्य न॒क्ष॒त्रं य॑त् पु॒न॒र्व॒सू स्वा॒या॒मे॒वैनं॑
दे॒व॒ता॒या॒मा॒धाय॑ ब्र॒ह्म॒व॒र्च॒सी भ॒वति॑ द॒र्भे () रा द॒धा॒त्य॒या॒त॒या॒म॒त्वा॒य
द॒र्भे॒रा द॒धा॒त्य॒द्भ्य॑ ए॒वैन॑मोष॒धी॒भ्यो ऽव॒रु॒द्ध्य॑ ऽऽ*ध॒त्ते प॒ञ्च॒क॒पा॒लः
पु॒रो॒डा॒शो भ॒वति॑ प॒ञ्च॒ वा ऋ॒त॒व ऋ॒तु॒भ्य ए॒वैन॑मव॒रु॒द्ध्य॑ ऽऽ*ध॒त्ते ॥ 4

TS 1.5.1.4 (Padam)

ऋ॒द्ध॑नोति । ए॒व । यः । अ॒स्य । ए॒वम् । ब॒न्धु॑ताम् । वे॒द । ब॒न्धु॑मा॒निति॑
ब॒न्धु॑ – मा॒न् । भ॒वति॑ । भा॒ग॒धे॒यमि॑ति भा॒ग – धे॒यम् । वै । अ॒ग्निः ।
आ॒हि॒त इ॒त्या – हि॒तः । इ॒च्छ॒मा॒नः । प्र॒जा॒मि॑ति प्र॒जा॒म् । प॒शून् ।
य॒ज॒मा॒नस्य॑ । उ॒पे॒ति । दो॒द्रा॒व । उ॒द्वा॒स्ये॒त्युत् – वा॒स्य । पु॒नः । ए॒ति ।
द॒धी॒त । भा॒ग॒धे॒ये॒ने॒ति भा॒ग – धे॒ये॒न । ए॒व । ए॒नम् । स॒मि॑ति ।
अ॒र्ध॒य॒ति । अ॒थो इ॒ति । शा॒न्तिः । ए॒व । अ॒स्य । ए॒षा । पु॒नर्व॑स्वो॒रिति॑
पु॒नः – व॒स्वोः । ए॒ति । द॒धी॒त । ए॒तत् । वै । पु॒नरा॑धे॒यस्ये॑ति
पु॒नः – आ॒धे॒यस्य॑ । न॒क्ष॒त्रम् । यत् । पु॒नर्व॑सू इति पु॒नः – व॒सू ।
स्वा॒या॒म् । ए॒व । ए॒नम् । दे॒वता॑याम् । आ॒धा॒ये॒त्या – धा॒य ।
ब्र॒ह्म॒व॒र्च॒सी॒ति ब्र॒ह्म – व॒र्च॒सी । भ॒वति॑ । द॒र्भैः () । ए॒ति । द॒धा॒ति ।
अ॒या॒त॒या॒म॒त्वा॒ये॒त्य॒या॒त॒या॒म – त्वा॒य । द॒र्भैः । ए॒ति । द॒धा॒ति ।
अ॒द्भ्य॑ इ॒त्यत् – भ्यः । ए॒व । ए॒नम् । ओ॒ष॒धी॒भ्य॑ इ॒त्यो॒ष॒धि॒भ्यः ।
अ॒व॒रु॑द्ध्ये॒त्यव॑ – रु॒द्ध्य । ए॒ति । ध॒त्ते । प॒ञ्च॒क॒पा॒ल इति॑
प॒ञ्च – क॒पा॒लः । पु॒रो॒डा॒शः । भ॒वति॑ । प॒ञ्च । वै । ऋ॒तवः॑ ।

ऋ॒तु॒भ्य॒ इत्यृ॒तु – भ्यः॒ । ए॒व । ए॒नम् । अ॒वरु॒द्ध्येत्य॑व – रु॒द्ध्य॒ ।
ए॒ति॒ । ध॒त्ते ॥ 4 (75)

(अ॒शी॒य॒त॒ तत्– ते॒न–वे॒द– द॒र्भैः॒ पञ्च॑वि॒ंश॑तिश्च) (A1)

TS 1.5.2.1

प॒रा वा ए॒ष य॒ज्ञं प॒शून् व॒पति॑ यो॒ऽग्नि॑मु॒द्वास॑य॒ते पञ्च॑क॒पालः॑
पु॒रोडा॑शो भ॒वति॑ पा॒ङ्क्तो॑ य॒ज्ञः पा॒ङ्क्ताः॑ प॒शवो॑ य॒ज्ञमे॒व प॒शून्व॑ रु॒न्धे
वी॒र॒हा वा ए॒ष दे॒वानां॑ यो॒ऽग्नि॑मु॒द्वास॑य॒ते न वा ए॒तस्य॑ ब्रा॒ह्म॒णा
ऋ॒ता॒य॒वः पु॒राऽन्न॑म॒क्षन् प॒ङ्क्त्यो॑ या॒ज्यानु॑वा॒क्या भ॑वन्ति पा॒ङ्क्तो॑ य॒ज्ञः
पा॒ङ्क्तः॑ पु॒रुषो॑ दे॒वाने॒व वी॒रं नि॒रव॑दा॒याग्निं॑ पु॒नरा – [] 5

TS 1.5.2.1 (Padam)

प॒रेति॑ । वै । ए॒षः । य॒ज्ञम् । प॒शून् । व॒पति॑ । यः । अ॒ग्निम् ।
उ॒द्वास॑य॒त इत्यु॑त् – वा॒स॑य॒ते । पञ्च॑क॒पाल॒ इति॑ पञ्च – क॒पालः॑ ।
पु॒रोडा॑शः । भ॒वति॑ । पा॒ङ्क्तः॑ । य॒ज्ञः । पा॒ङ्क्ताः॑ । प॒शवः॑ । य॒ज्ञम् ।
ए॒व । प॒शून् । अ॒वेति॑ । रु॒न्धे । वी॒र॒हेति॑ वी॒र – हा । वै । ए॒षः ।
दे॒वाना॑म् । यः । अ॒ग्निम् । उ॒द्वास॑य॒त इत्यु॑त् – वा॒स॑य॒ते । न । वै ।
ए॒तस्य॑ । ब्रा॒ह्म॒णाः । ऋ॒ता॒य॒व इत्यृ॑त–य॒वः । पु॒रा । अ॒न्नम् । अ॒क्षन् ।

पङ्क्त्यः । याज्यानुवाक्या इति याज्या – अनुवाक्याः । भवन्ति ।

पाङ्क्तः । यज्ञः । पाङ्क्तः । पुरुषः । देवान् । एव । वीरम् ।

निरवदायेति निः – अवदाय । अग्निम् । पुनः । एति । 5 (50)

TS 1.5.2.2

धत्ते शताक्षरा भवन्ति शतायुः पुरुषः शतेन्द्रिय आयुष्येवेन्द्रिये
प्रति तिष्ठति यद्वा अग्निराहितो नर्द्ध्यते ज्यायो भागधेयं
निकामयमानो यदाग्नेयं सर्वं भवति सैवास्यर्द्धिः सं वा एतस्य
गृहे वाक्सृज्यते योऽग्निमुद्वासयते स वाचं सृष्ट्वा यजमान
ईश्वरोऽनु पराभवितो विभक्तयो भवन्ति वाचो विधृत्यै

यजमानस्या-पराभावाय – [] 6

TS 1.5.2.2 (Padam)

धत्ते । शताक्षरा इति शत – अक्षराः । भवन्ति । शतायुरिति
शत – आयुः । पुरुषः । शतेन्द्रिय इति शत – इन्द्रियः । आयुषि ।
एव । इन्द्रिये । प्रतीति । तिष्ठति । यत् । वै । अग्निः ।
आहित इत्या – हितः । न । ऋद्ध्यते । ज्यायः । भागधेयमिति
भाग – धेयम् । निकामयमान इति नि – कामयमानः । यत् ।

आ॒ग्ने॒यम् । सर्व॑म् । भव॑ति । सा । ए॒व । अ॒स्य । ऋ॒द्धिः । समि॑ति ।
 वै । ए॒तस्य॑ । गृ॒हे । वाक् । सृ॒ज्यते॑ । यः । अ॒ग्निम् । उ॒द्वा॒सय॑त
 इत्यु॑त् – वा॒सय॑ते । सः । वाच॑म् । स॒सृष्टा॑मि॒ति सं – सृष्टा॑म् ।
 यज॑मानः । ई॒श्वरः । अ॒न्वि॒ति । प॒रा॒भवि॑तो॒रिति॑ प॒रा – भ॒वि॒तोः ।
 वि॒भक्त॑य इति॒ वि – भ॒क्त॑यः । भ॒वन्ति॑ । वा॒चः । वि॒धृ॒त्या इति॑
 वि – धृ॒त्यै । यज॑मानस्य । अ॒प॒रा॒भावा॑येत्य॒प॒रा – भा॒वाय॑ । 6 (50)

TS 1.5.2.3

वि॒भक्तिं॑ क॒रोति॑ ब्र॒ह्मै॒व तद॑क॒रुपा॑ञ्शु यज॑ति यथा॒ वामं॑ व॒सु
 वि॒विदा॑नो गू॒हति॑ ता॒दृगे॒व तद॑ग्निं प्र॒ति स्वि॑ष्ट॒कृतं॑ नि॒राह॑ यथा॒ वामं॑
 व॒सु वि॒विदा॑नः प्र॒काशं॑ जिगमिषति ता॒दृगे॒व तद्वि॑भक्तिमु॒क्त्वा प्र॑या॒जेन॑
 वषट्क॑रोत्या॒यत॑नादे॒व नैति॑ यज॑मानो॒ वै पु॒रोडा॑शः प॒शव॑ ए॒ते आ॒हुती॑
 यद॒भितः॑ पु॒रोडा॑शमे॒ते आ॒हुती॑ – [] 7

TS 1.5.2.3 (Padam)

वि॒भक्ति॑मि॒ति वि – भ॒क्तिम् । क॒रोति॑ । ब्र॒ह्म । ए॒व । तत् । अ॒कः ।
 उ॒पा॒ञ्श्वित्यु॑प – अ॒ञ्शु । यज॑ति । यथा॑ । वा॒मम् । व॒सु । वि॒विदा॑नः ।

गू॒हति॑ । ता॒दृक् । ए॒व । तत् । अ॒ग्निम् । प्र॒तीति॑ । स्वि॒ष्टकृ॒तमि॒ति॑
स्वि॒ष्ट- कृ॒तम् । नि॒रिति॑ । आ॒ह । यथा॑ । वा॒मम् । व॒सु । वि॒विदा॒नः ।
प्र॒काश॑मि॒ति प्र - का॒शम् । जि॒गमि॑षति । ता॒दृक् । ए॒व । तत् ।
वि॒भक्ति॑मि॒ति वि - भ॒क्तिम् । उ॒क्त्वा । प्र॒याजे॑नेति॒ प्र - या॒जेन॑ ।
व॒षट् । क॒रोति॑ । आ॒यत॑ना॒दित्या॑ - यत॑नात् । ए॒व । न । ए॒ति ।
यज॑मानः । वै । पु॒रोडा॑शः । प॒शवः॑ । ए॒ते इति॑ ।
आ॒हुती॑ इत्या - हु॒ती । यत् । अ॒भितः॑ । पु॒रोडा॑शम् । ए॒ते इति॑ ।
आ॒हुती॑ इत्या - हु॒ती । 7 (50)

TS 1.5.2.4

जु॒होति॑ यज॑मानमे॒वोभ॑यतः प॒शुभिः॑ परि॑ गृ॒ह्णाति॑कृ॒तय॑जुः
संभृ॑तसंभार॒ इत्याहु॑र्न संभृ॒त्याः संभारा॑ न यजुः कर्त॑व्यमित्यथो॒ खलु॑
संभृ॑त्या ए॒व संभाराः॑ कर्त॑व्यं य॒जु र्यज्ञ॑स्य॒ समृ॑द्ध्यैपुनर्निष्कृ॒तो
रथो॑ दक्षि॒णा पु॑नरु॒थस्यू॑तं वा॒सः पु॑नरु॒थसृष्टोऽन॑ड्वान् पु॒नरा॒धेय॑स्य
समृ॑द्ध्यै स॒प्त ते॑ अ॒ग्ने स॒मिधः॑ स॒प्त जि॒ह्वा इत्य॑ग्निहो॒त्रं
जु॒होति॑ यत्र॑यत्रै॒वास्य॑ न्य॒क्तं तत॑ - [] 8

TS 1.5.2.4 (Padam)

जु॒होति॑ । यज॑मानम् । ए॒व । उ॒भय॑तः । प॒शुभि॑रिति प॒शु – भिः॑ ।
परी॑ति । गृ॒ह्णाति॑ । कृ॒तय॑जु॒रिति॑ कृ॒त – य॒जुः । सं॒भृत॑सं॒भार॑ इति॒
सं॒भृत॑ – सं॒भारः॑ । इति॑ । आ॒हुः । न । सं॒भृत्या॑ इति॑ सं – भृत्याः॑ ।
सं॒भारा॑ इति॑ सं–भाराः॑ । न । य॒जुः । क॒र्तव्य॑म् । इति॑ । अथो॒ इति॑ ।
खलु॑ । सं॒भृत्या॑ इति॑ सं – भृत्याः॑ । ए॒व । सं॒भारा॑ इति॑ सं–भाराः॑ ।
क॒र्तव्य॑म् । य॒जुः । य॒ज्ञस्य॑ । स॒मृद्ध्य॑ इति॑ सं – ऋ॒द्ध्यै ।
पुन॑र्निष्कृत इति॑ पुनः – निष्कृतः॑ । रथः॑ । दक्षि॑णा ।
पुन॑रु॒थ्स्यू॑तमिति॑ पुनः – उ॒थ्स्यू॑तम् । वासः॑ । पुन॑रु॒थ्सृष्ट॑ इति॑
पुनः – उ॒थ्सृष्टः॑ । अ॒न॒ड्वान् । पुन॑रा॒धेय॑स्येति॑ पुनः – आ॒धेय॑स्य ।
स॒मृद्ध्य॑ इति॑ सं – ऋ॒द्ध्यै । स॒प्त । ते । अ॒ग्ने । स॒मिध॑ इति॑
सं – इ॒धः । स॒प्त । जि॒ह्वाः । इति॑ । अ॒ग्नि॒हो॒त्रमि॑त्य॒ग्नि – हो॒त्रम् ।
जु॒होति॑ । य॒त्रय॑त्रेति॑ य॒त्र–य॒त्र । ए॒व । अ॒स्य ।
न्य॒क्तमि॑ति॒ नि – अ॒क्तम् । ततः॑ । 8 (50)

TS 1.5.2.5

ए॒वैन॒मव॑ रु॒न्धे वी॒रहा॑ वा ए॒ष दे॒वानां॑ यो॒ऽग्निमु॑द्वा॒सय॑ते तस्य॒ वरु॑ण
ए॒वर्ण॑यादा॒ग्निवा॑रुण॒-मेका॑दशकपालम॒नु निर्व॑पेद्यं चै॒व ह॑न्ति
यश्चा॒स्यर्ण॑यातौ भा॒गधे॑येन प्रीणाति॒ नाऽऽर्ति॑मा॒र्च्छति॒ यज॑मानः ॥ 9

TS 1.5.2.5 (Padam)

ए॒व । ए॒नम् । अ॒वेति॑ । रु॒न्धे । वी॒रहे॑ति वी॒र – हा । वै । ए॒षः ।
दे॒वानाम् । यः । अ॒ग्निम् । उ॒द्वा॒सय॑त इत्युत् – वा॒सय॑ते । तस्य॒ ।
वरु॑णः । ए॒व । ऋ॒णया॑दित्यृण – यात् ।
आ॒ग्निवा॑रुणमि॒त्याग्नि॑ – वा॒रुणम् ।
एका॑दशकपालमि॒त्येका॑दश – क॒पालम् । अ॒नु । नि॒रिति॑ । व॒पेत् ।
यम् । च । ए॒व । ह॑न्ति । यः । च । अ॒स्य । ऋ॒णया॑दित्यृण – यात् ।
तौ । भा॒गधे॑येनेति भा॒ग – धे॑येन । प्री॒णाति॒ । न । आ॒र्तिम् । ए॒ति ।
ऋ॒च्छति॒ । यज॑मानः ॥ 9 (36)

(आ-ऽपराभावाय-पुरोडाशमेते-आहुती-ततः-षट्त्रिंशच्च) (A2)

TS 1.5.3.1

भूमि॑ भू॒म्ना द्यौ॑ वरि॒णाऽन्तरि॑क्षं म॒हित्वा ।

उप॒स्थे ते दे॒व्यदि॑ते ऽग्नि॒मन्ना॑दमन्नाद्यायाऽऽद॑धे ॥

आऽयं गौः पृ॒श्नि॒र॒क्र॒मी॒द॒सन॑न् मा॒तरं पुनः॑ ।

पि॒तरं च प्र॒यन्त्सु॑वः ॥

त्रि॒ंश॒ब्धाम॒ वि रा॑जति वाक् प॒त॒ङ्गाय॑ शि॒श्रिये॑ । प्र॒त्यस्य॑ वह॒ द्युभिः॑ ॥

अस्य॑ प्रा॒णाद॑पा॒न॒त्यन्त॑श्चरति रो॒चना । व्य॑ख्यन् म॒हिषः सु॑वः ॥

यत्त्वा-[] 10

TS 1.5.3.1 (Padam)

भूमिः॑ । भू॒म्ना । द्यौः॑ । वरि॒णा । अ॒न्तरि॑क्षम् । म॒हित्वेति॑ म॒हि-त्वा ॥

उप॒स्थ इत्यु॑प – स्थे । ते । दे॒वि । अ॒दि॒ते । अ॒ग्निम् ।

अ॒न्नाद॑मित्यन्न – अ॒दम् । अ॒न्नाद्या॑येत्यन्न – अद्याय । एति॑ ।

दधे ॥ एति॑ । अ॒यम् । गौः॑ । पृ॒श्निः॑ । अ॒क्र॒मीत् । अ॒सन॑त् ।

मा॒तरम् । पुनः॑ ॥ पि॒तरम् । च । प्र॒य॒न्निति॑ प्र – यन् । सु॑वः ॥

त्रि॒ंश॒त् । धाम॑ । वी॒ति । रा॒ज॒ति । वाक् । प॒त॒ङ्गाय॑ । शि॒श्रिये॑ ॥

प्रतीति॑ । अ॒स्य । वह॑ । द्युभि॒रिति॑ द्यु – भिः । अ॒स्य ।

प्रा॒णादि॑ति प्र – अ॒नात् । अ॒पा॒न॒तीत्य॑प – अ॒न॒ती । अ॒न्तः । च॒र॒ति ।
रो॒च॒ना ॥ वी॑ति । अ॒ख्य॑त् । म॒हि॒षः । सु॒वः ॥ यत् । त्वा । 10 (50)

TS 1.5.3.2

क्रु॒द्धः प॒रो॒वप॑ म॒न्यु॒ना यद॑व॒र्त्या ।
सु॒क॒ल्प॑म॒ग्ने त॒त्तव॑ पु॒न॒स्त्वो॑दी॒पया॑म॒सि ॥
य॒त्ते म॒न्यु॒प॒रो॒प्त॑स्य पृ॒थि॒वीम॑नु द॒ध्व॒से ।
आ॒दि॒त्या वि॒श्वे त॒द्दे॒वा व॑स॒वश्च॑ स॒माभ॑रन् ॥
म॒नो ज्यो॑ति॒र्जु॒षता॑मा॒ज्यं वि॑च्छिन्नं य॒ज्ञं स॒मिमं॑ द॒धातु॑ ।
बृ॒ह॒स्प॒ति॒स्तनु॑तामिमं नो वि॒श्वे दे॒वा इ॒ह मा॑दयन्तां ॥
स॒प्त ते॑ अ॒ग्ने स॒मिधः॑ स॒प्त जि॒ह्वाः स॒प्त – [] 11

TS 1.5.3.2 (Padam)

क्रु॒द्धः । प॒रो॒वपे॑ति प॒रा – उ॒प॒व । म॒न्यु॒ना । यत् । अ॒व॒र्त्या ॥
सु॒क॒ल्प॑मि॒ति सु॒ – क॒ल्प॑म् । अ॒ग्ने । तत् । तव॑ । पु॒नः । त्वा ।
उ॒दि॒ति । दी॒प॒या॒म॒सि ॥ यत् । ते । म॒न्यु॒प॒रो॒प्त॑स्येति म॒न्यु॒प॒रो॒प्त॑स्य ।
पृ॒थि॒वीम् । अ॒न्वि॒ति । द॒ध्व॒से ॥ आ॒दि॒त्याः । वि॒श्वे । तत् । दे॒वाः ।
व॒स॒वः । च । स॒माभ॑र॒न्निति॑ सं – आ॒भ॒रन् ॥ म॒नः । ज्यो॑तिः ।

जु॒षता॑म् । आ॒ज्यम् । वि॒च्छिन्न॑मि॒ति वि – छि॒न्नम् । य॒ज्ञम् ।
समि॑ति । इ॒मम् । द॒धातु॑ ॥ बृ॒हस्प॑तिः । त॒नुता॑म् । इ॒मम् । नः ।
वि॒श्वे॑ । दे॒वाः । इ॒ह । मा॒दय॑न्ता॒म् ॥ स॒प्त । ते । अ॒ग्ने ।
स॒मिध॑ इति सं – इ॒धः । स॒प्त । जि॒ह्वाः । स॒प्त । 11 (50)

TS 1.5.3.3

र॒षयः॑ स॒प्त धाम॑ प्रि॒याणि॑ ।
स॒प्त हो॒त्राः॑ स॒प्तधा॑ त्वा यज॑न्ति स॒प्त यो॒नीरा॑ पृ॒णस्वा॑ घृ॒तेन॑ ॥
पुन॑रूर्जा नि वर्त॑स्व पुन॑रग्न इ॒षाऽऽयु॑षा । पुन॑र्नः पाहि वि॒श्वतः॑ ॥
स॒ह र॒य्या नि वर्त॑स्वाग्ने पि॒न्वस्व॑ धार॒या ।
वि॒श्वफ॑स्नि॒या वि॒श्वत॑स्परि ॥
ले॒कः स॒लेकः॑ सु॒लेक॑स्ते न आ॒दित्या॑ आ॒ज्यं जु॒षाणा॑ वि॒यन्तु॑ के॒तः
स॒केतः॑ सु॒केत॑स्ते न () आ॒दित्या॑ आ॒ज्यं जु॒षाणा॑ वि॒यन्तु॑ वि॒वस्वा॑ ॐ
अ॒दिति॑ दे॒वजू॑तिस्ते न आ॒दित्या॑ आ॒ज्यं जु॒षाणा॑ वि॒यन्तु॑ ॥ 12

TS 1.5.3.3 (Padam)

ऋ॒षयः॑ । स॒प्त । धाम॑ । प्रि॒याणि॑ ॥ स॒प्त । हो॒त्राः॑ । स॒प्त॒धेति॑
स॒प्त – धा॑ । त्वा॑ । यज॑न्ति । स॒प्त । यो॒नीः॑ । ए॒ति॑ । पृ॒णस्व॑ ।

घृ॒तेन॑ ॥ पुनः॑ । ऊ॒र्जा । नी॒ति । वर्त॑स्व । पुनः॑ । अ॒ग्ने । इ॒षा ।
 आ॒युषा॑ ॥ पुनः॑ । नः॑ । पा॒हि । वि॒श्वतः॑ ॥ स॒ह । र॒य्या । नी॒ति ।
 वर्त॑स्व । अ॒ग्ने॑ ॥ पि॒न्वस्व॑ । धा॒रया॑ ॥ वि॒श्व॒फ॒स्निये॑ति
 वि॒श्व – फ॒स्निय॑ । वि॒श्वतः॑ । परि॑ ॥ ले॒कः । स॒ले॒क इति॑
 स – ले॒कः । सु॒ले॒क इति॑ सु – ले॒कः । ते । नः॑ । आ॒दि॒त्याः ।
 आ॒ज्यम्॑ ॥ जु॒षा॒णाः । वि॒यन्तु॑ । के॒तः । स॒के॒त इति॑ स – के॒तः ।
 सु॒के॒त इति॑ सु – के॒तः । ते । नः॑ () । आ॒दि॒त्याः । आ॒ज्यम्॑ ।
 जु॒षा॒णाः । वि॒यन्तु॑ । वि॒वस्वा॑न् । अ॒दि॒तिः । दे॒व॒जू॒तिरिति॑
 दे॒व – जू॒तिः । ते । नः॑ । आ॒दि॒त्याः । आ॒ज्यम्॑ । जु॒षा॒णाः ।
 वि॒यन्तु॑ ॥ 12 (63)

(त्वा-जिह्वाः सप्त-सुकेतस्ते न-स्त्रयोदश च) (A3)

TS 1.5.4.1

भू॒मि॑ भू॒म्ना॑ द्यौ॑ वरि॒णेत्या॑हा-ऽऽशि॒षैवैन॑मा ध॒त्ते॒सर्पा॑ वै जी॒र्यन्तो॑
 ऽम॒न्यन्त॑ स ए॒तं क॑स॒र्णीरः॑ का॒द्रवे॒यो म॒न्त्रम॑पश्यत् ततो॑ वै ते
 जी॒र्णास्त॑नूरपा॒घ्नत॑ सर्परा॒ज्ञिया॑ ऋ॒ग्भिर्गा॑र्हप॒त्यमा॑ दधाति

पुन॑र्नवमे॒वैनम॒जरं॑ कृ॒त्वा ऽऽ*ध॒त्तेऽथो॑ पू॒तमे॒व पृ॒थि॒वीम॒न्नाद्यं॑
नोपा॑नमथ्सैतं – [] 13

TS 1.5.4.1 (Padam)

भूमिः॑ । भू॒म्ना । द्यौः॑ । व॒रि॒णा । इति॑ । आ॒ह । आ॒शि॒षेत्या॑ – शि॒षा॑ ।
ए॒व । ए॒नम् । एति॑ । ध॒त्ते । सर्पाः॑ । वै । जी॒र्यन्तः॑ । अ॒म॒न्यन्त॑ ।
सः । ए॒तम् । क॒स॒र्णी॒रः । का॒द्र॒वेयः॑ । मन्त्र॑म् । अ॒प॒श्यत् । ततः॑ ।
वै । ते । जी॒र्णाः । त॒नूः । अ॒पेति॑ । अ॒घ्न॒त । सर्प॑राज्ञिया इति॑
सर्प॑ – राज्ञियाः॑ । ऋ॒ग्भि॒रित्यृक्॑ – भिः॑ । गा॒र्.ह॑पत्यमिति॑
गा॒र्.ह॑ – प॒त्यम् । एति॑ । द॒धाति॑ । पु॒न॑र्नवमिति॑ पु॒नः – न॒वम् । ए॒व ।
ए॒नम् । अ॒ज॒रम् । कृ॒त्वा । एति॑ । ध॒त्ते । अथो॑ इति॑ । पू॒तम् ।
ए॒व । पृ॒थि॒वीम् । अ॒न्नाद्य॑मित्यन्न – अ॒द्यम् । न । उ॒पेति॑ । अ॒न॒मत् ।

सा । ए॒तम् । 13 (50)

TS 1.5.4.2

मन्त्र॑मपश्यत् ततो॑ वै ताम॒न्नाद्य॑-मुपा॑नमद्यथ॑ सर्प॑राज्ञिया॑ ऋ॒ग्भिर्
गा॒र्.ह॑पत्य-मा॒द॒धात्य॑न्नाद्य॒स्या व॑रुद्ध्य॑ अथो॑ अ॒स्यामे॒वैनं॑ प्र॒ति॒ष्ठि॒तमा॑
ध॒त्ते य॒त्वा क्रु॒द्धः प॒रो॒व॒पेत्या॑हाप॑ हु॒त ए॒वास्मै॑ तत्

पुन॑स्त्वो॒दीप॑याम॒सीत्या॑ह॒ समि॑न्ध ए॒वैनं॑ य॒त्ते म॒न्युप॑रो॒प्तस्ये॑त्याह॒
दे॒वता॑भिरे॒वै – [] 14

TS 1.5.4.2 (Padam)

मन्त्र॑म् । अ॒प॒श्यत् । ततः॑ । वै । ताम् । अ॒न्नाद्य॑मित्य॒न्न – अद्य॑म् ।
उ॒पेति॑ । अ॒न॒मत् । यत् । सर्प॑रा॒ज्ञिया॑ इति॑ सर्प॑ – रा॒ज्ञियाः॑ ।
ऋ॒ग्भिरि॑त्यृक् – भिः । गा॒र्ह॒प॒त्यमि॑ति॒ गा॒र्ह – प॒त्यम् ।
आ॒द॒धा॒तीत्या॑ – द॒धाति॑ । अ॒न्नाद्य॑स्येत्य॒न्न – अद्य॑स्य ।
अ॒वरु॑द्ध्य॒ इत्य॑व – रु॒द्ध्यै । अथो॑ इति॑ । अ॒स्याम् । ए॒व । ए॒नम् ।
प्रति॑ष्ठितमि॒ति प्रति॑ – स्थि॒तम् । ए॒ति । ध॒त्ते । यत् । त्वा । कु॒ब्धः ।
प॒रो॒व॒पेति॑ प॒रा – उ॒व॒प । इति॑ । आ॒ह । अ॒पेति॑ । हु॒ते । ए॒व ।
अ॒स्मै । तत् । पुनः॑ । त्वा । उ॒दि॒ति । दी॒प॒या॒म॒सि । इति॑ । आ॒ह ।
स॒मि॒ति । इ॒न्धे । ए॒व । ए॒नम् । यत् । ते । म॒न्युप॑रो॒प्तस्ये॑ति॒
म॒न्यु – प॒रो॒प्त॒स्य । इति॑ । आ॒ह । दे॒वता॑भिः । ए॒व । 14 (50)

TS 1.5.4.3

न॒ञ् सं भ॑रति॒ वि वा ए॒तस्य॑ य॒ज्ञश्छि॑द्यते॒ योऽग्नि॑मु॒द्वा॒सय॑ते॒
बृ॒ह॒स्पति॑व॒त्यर्चो॑प॒ तिष्ठ॑ते ब्र॒ह्म वै दे॒वानां॑ बृ॒ह॒स्पति॑ ब्र॒ह्मणै॑व

य॒ज्ञं सं द॒धाति॑ वि॒च्छिन्नं॑ य॒ज्ञं स॒मिमं॑ द॒धात्वित्या॑ह स॒न्तत्यै॑
वि॒श्वे दे॒वा इ॒ह मा॒दयन्ता॑मित्या॒ह स॒न्तत्यै॑व य॒ज्ञं दे॒वेभ्योऽनु॑ दि॒शति॑
स॒प्त ते अ॒ग्ने स॒मिधः॑ स॒प्त जि॒ह्वा – [] 15

TS 1.5.4.3 (Padam)

ए॒नम् । स॒मिति॑ । भ॒रति॑ । वी॒ति । वै । ए॒तस्य॑ । य॒ज्ञः । छि॒द्यते॑ ।
यः । अ॒ग्निम् । उ॒द्वास॑यत इत्युत् – वा॒सय॑ते । बृ॒हस्प॑तिव॒त्येति॑
बृ॒हस्प॑ति – व॒त्या । ऋ॒चा । उ॒पेति॑ । ति॒ष्ठते॑ । ब्र॒ह्म । वै । दे॒वाना॑म् ।
बृ॒हस्प॑तिः । ब्र॒ह्मणा॑ । ए॒व । य॒ज्ञम् । स॒मिति॑ । द॒धाति॑ ।
व॒च्छिन्न॑मिति॒ वि-छि॒न्नम् । य॒ज्ञम् । स॒मिति॑ । इ॒मम् । द॒धातु॑ । इति॑ ।
आ॒ह । स॒न्तत्या॑ इति॒ सं – त॒त्यै । वि॒श्वे॑ । दे॒वाः । इ॒ह । मा॒दय॑न्ता॒म् ।
इति॑ । आ॒ह । स॒न्तत्ये॑ति॒ सं – त॒त्य । ए॒व । य॒ज्ञम् । दे॒वेभ्यः॑ ।
अ॒न्विति॑ । दि॒शति॑ । स॒प्त । ते । अ॒ग्ने । स॒मिध॑ इति॒ सं – इ॒धः ।
स॒प्त । जि॒ह्वाः । 15 (50)

TS 1.5.4.4

इत्या॑ह स॒प्तस॒प्त वै स॒प्तधा॑ग्नेः प्रि॒यास्त॒नुव॑स्ता ए॒वाव॑ रु॒न्धे
पुन॑रू॒र्जा स॒ह र॒य्येत्य॑भि॒तः पु॒रोडा॑श॒माहु॑ती जु॒होति॑ य॒जमा॑नमे॒वोर्जा॑

च र॒य्या चो॒भयतः॑ परि॑ गृ॒ह्णा॒त्यादि॒त्या वा अ॒स्मा॒ल्लो॒काद॒मुं
 लो॒कमा॒यन्ते॑ऽमु॒ष्मिन् लो॒के व्य॑तृ॒ष्यन्त इ॒मं लो॒कं पुन॑र॒भ्यवे॒त्या
 ऽग्नि॑मा॒धायै॒तान् () हो॒मान॑जुहवु॒स्त आ॒र्द्ध॒धनु॒वन्ते सु॒वर्गं लो॒कमा॒यन्
 यः प॒रा॒चीनं॑ पुन॒रा॒धेया॑द॒ग्निमा॒दधी॑त स ए॒तान् हो॒मान्
 जुहु॒याद्या॒मेवाऽऽदि॒त्या ऋ॒द्धिमा॑र्द्ध॒धनु॒वन् तामे॒वर्द्ध॑नोति ॥ 16

TS 1.5.4.4 (Padam)

इति॑ । आ॒ह । स॒प्तस॒प्तेति॑ स॒प्त – स॒प्त । वै । स॒प्त॒धेति॑
 स॒प्त – धा । अ॒ग्नेः । प्रि॒याः । त॒नुवः॑ । ताः । ए॒व । अ॒वेति॑ । रु॒न्धे ।
 पुनः॑ । ऊ॒र्जा । स॒ह । र॒य्या । इति॑ । अ॒भितः॑ । पु॒रोडा॑शम् ।
 आ॒हुती॑ इत्या – हु॒ती । जु॒होति॑ । यज॑मानम् । ए॒व । ऊ॒र्जा । च ।
 र॒य्या । च । उ॒भयतः॑ । प॒रीति॑ । गृ॒ह्णा॒ति । आ॒दि॒त्याः । वै । अ॒स्मात् ।
 लो॒कात् । अ॒मुम् । लो॒कम् । आ॒यन् । ते । अ॒मुष्मि॑न् । लो॒के ।
 वी॒ति । अ॒तृ॒ष्यन् । ते । इ॒मम् । लो॒कम् । पुनः॑ ।
 अ॒भ्यवे॒त्येत्य॑भि – अ॒वेत्य॑ । अ॒ग्निम् । आ॒धाये॒त्या – धाय॑ ।
 ए॒तान् () । हो॒मान् । अ॒जुह॒वुः । ते । आ॒र्द्ध॒धनु॒वन् । ते ।

सु॒वर्ग॑मि॒ति सु॒वः – ग॒म् । लो॒कम् । आ॒यन् । यः । प॒रा॒ची॒नम् ।
पुन॑रा॒धेया॑दि॒ति पुनः – आ॒धेया॑त् । अ॒ग्निम् । आ॒दधी॑तेत्या॒ – दधी॑त ।
सः । ए॒तान् । हो॒मान् । जु॒हुया॑त् । या॒म् । ए॒व । आ॒दि॒त्याः ।
ऋ॒द्धि॑म् । आ॒र्द्ध॑न्वन् । ता॒म् । ए॒व । ऋ॒द्ध॑नो॒ति ॥ 16 (75)

(सै॒तं-दे॒वता॑भि॒रेव-जि॒ह्वा-ए॒तान्-पञ्च॑विं॒शति॑श्च) (A4)

TS 1.5.5.1

उप॑प्र॒यन्तो॑ अ॒ध्व॒रं मन्त्रं॑ वो॒चेमा॒ग्नये॑ । आ॒रे अ॒स्मे च॑ शृ॒ण्व॒ते ॥
अ॒स्य प्र॒त्ना॒मनु॑ द्यु॒तं शु॒क्रं दु॒दुहे॑ अ॒ह॒यः । प॒यः स॒हस्र॑सामृषि॑ ॥
अ॒ग्नि॒र्मूर्द्धा॑ दि॒वः क॒कुत्प॑तिः पृथि॒व्या अ॒यं ।
अ॒पां रे॒तांसि॑ जि॒न्व॒ति ॥

अ॒यमि॒ह प्र॒थ॒मो धा॒यि धा॒तृभि॑र् होता॒ यजि॑ष्ठो अ॒ध्व॒रेष्वी॑ड्यः ।
यम॑प्न॒वानो॑ भृ॒गवो॑ वि॒रु॒रुचु॑र्व॒नेषु॑ चि॒त्रं वि॒भुवं॑ वि॒शेवि॑शे ॥
उ॒भा वा॑मि॒न्द्रा॒ग्नी आ॒हुव॑द्ध्य॒ – [] 17

TS 1.5.5.1 (Padam)

उप॑प्र॒यन्त॑ इत्युप॒-प्र॒यन्तः॑ । अ॒ध्व॒रम् । मन्त्र॑म् । वो॒चे॒म । अ॒ग्नये॑ ॥
आ॒रे । अ॒स्मे इति॑ । च॒ । शृ॒ण्व॒ते ॥ अ॒स्य । प्र॒त्ना॒म् । अ॒न्विति॑ ।

द्यु॑तम् । शु॒क्रम् । दु॒दु॒हे । अ॒हयः॑ ॥ पयः॑ । स॒ह॒स्र॒सामि॑ति
सह॒स्र-साम् । ऋ॒षिम् ॥ अ॒ग्निः । मूर्द्॑धा । दि॒वः । क॒कुत् । पतिः॑ ।
पृ॒थि॒व्याः । अ॒यम् ॥ अ॒पाम् । रेता॑ꣳसि । जि॒न्वति॑ ॥ अ॒यम् । इ॒ह ।
प्र॒थमः॑ । धा॒यि । धा॒तृभि॑रिति॑ धा॒तृ - भिः॑ । हो॒ता । यजि॑ष्ठः ।
अ॒ध्व॒रेषु॑ । ई॒ड्यः॑ ॥ यम् । अ॒प्न॒वानः॑ । भृ॒गवः॑ ।
वि॒रु॒रुचु॑रिति॑ वि - रु॒रुचुः॑ । वने॑षु । चि॒त्रम् । वि॒भुव॑मिति॑
वि - भु॒वम् । वि॒शेवि॑श इति॑ वि॒शे - वि॒शे ॥ उ॒भा । वा॒म् ।
इ॒न्द्रा॒ग्नी इ॒तीन्द्र॑ - अ॒ग्नी । आ॒हु॒व॒द्ध्यै॑ ॥ 17 (50)

TS 1.5.5.2

उ॒भा रा॒धसः॑ स॒ह मा॑दय॒द्ध्यै॑ ।
उ॒भा दा॒तारा॑वि॒षाꣳ रयी॑णामु॒भा वा॒जस्य॑ सा॒तये॑ हु॒वे वां ॥
अ॒यं ते॒ योनि॑र्. ऋ॒त्वियो॑ यतो॑ जा॒तो अ॒रोच॑थाः ।
तं जा॒नन्न॑ग्न आ रो॒हाथा॑ नो वर्द्ध॒या रयिं॑ ॥
अ॒ग्न आ॒यूꣳषि॑ पव॒स आ सु॒वोर्ज॑मिषं च नः ।
आ॒रे बा॑धस्व दु॒च्छु॑नां ॥

अग्ने॑ पव॒स्व स्व॒पा अ॒स्मे वर्चः॑ सु॒वीर्यं॑ ।

दध॒त्पोष॑ रयिं – [] 18

TS 1.5.5.2 (Padam)

उ॒भा । रा॒धसः॑ । स॒ह । मा॒दय॑द्ध्यै ॥ उ॒भा । दा॒तारौ॑ । इ॒षाम् ।
र॒यी॒णाम् । उ॒भा । वा॒जस्य॑ । सा॒तये॑ । हु॒वे । वा॒म् ॥ अ॒यम् । ते ।
यो॒निः । ऋ॒त्वि॒यः । य॒तः । जा॒तः । अ॒रोच॑थाः ॥ तम् । जा॒नन् ।
अ॒ग्ने । ए॒ति । रो॒ह । अ॒थ । नः । व॒र्द्ध॒य । र॒यिम् ॥ अ॒ग्ने ।
आ॒यू॒षि । प॒व॒से । ए॒ति । सु॒व । ऊ॒र्जम् । इ॒षम् । च । नः ॥ आ॒रे ।
बा॒ध॒स्व । दु॒च्छु॒नाम् ॥ अ॒ग्ने । प॒व॒स्व । स्व॒पा इति॑ सु – अ॒पाः ।
अ॒स्मे इति॑ । वर्चः॑ । सु॒वीर्य॑मिति॑ सु – वी॒र्यम् ॥ दध॑त् । पो॒षम् ।

र॒यिम् । 18 (50)

TS 1.5.5.3

म॒यि ॥

अ॒ग्ने पा॒वक॑ रो॒चिषा॑ म॒न्द्रया॑ दे॒व जि॒ह्वया॑ ।

आ दे॒वान् व॒क्षि य॒क्षि च ॥

स नः॑ पा॒वक॑ दी॒दिवो॑ऽग्ने॑ दे॒वा इ॒हा ऽऽ*व॑ह ।

उप॒ य॒ज्ञ॒ꣳ ह॒वि॒श्च॒ नः॑ ॥

अ॒ग्निः॑ शु॒चि॒व्र॒त॒त॒मः॑ शु॒चि॒र्वि॒प्रः॑ शु॒चिः॑ क॒विः॑ ।

शु॒ची॑ रो॒च॒त आ॒हु॒तः॑ ॥

उद॒ग्ने॑ शु॒चय॑स्त॒व शु॒क्रा॑ भ्राज॒न्त ई॒र॒ते । त॒व ज्योती॑ꣳर्च॒यः॑ ॥

आ॒यु॒र्दा अ॒ग्नेऽस्या॑यु॒र्मे- [] 19

TS 1.5.5.3 (Padam)

म॒यि ॥ अ॒ग्ने॑ । पा॒व॒क॒ । रो॒चि॒षा॑ । म॒न्द्र॒या॑ । दे॒व । जि॒ह्वा॑ ॥ ए॒ति॑ ।

दे॒वान् । व॒क्षि॑ । य॒क्षि॑ । च ॥ सः॑ । नः॑ । पा॒व॒क॒ । दी॒दि॒वः॑ । अ॒ग्ने॑ ।

दे॒वान् । इ॒ह । ए॒ति॑ । व॒ह ॥ उ॒पे॒ति॑ । य॒ज्ञ॒म् । ह॒विः॑ । च । नः॑ ॥

अ॒ग्निः॑ । शु॒चि॒व्र॒त॒त॒म इति॑ शु॒चि॒व्र॒त - त॒मः॑ । शु॒चिः॑ । वि॒प्रः॑ ।

शु॒चिः॑ । क॒विः॑ ॥ शु॒चिः॑ । रो॒च॒ते॑ । आ॒हु॒त इत्या॑ - हु॒तः॑ ॥ उ॒दि॒ति॑ ।

अ॒ग्ने॑ । शु॒चयः॑ । त॒व । शु॒क्राः॑ । भ्राज॒न्तः॑ । ई॒र॒ते ॥ त॒व ।

ज्योती॑ꣳषि॑ । अ॒र्च॒यः॑ ॥ आ॒यु॒र्दा इत्या॑युः - दाः॑ । अ॒ग्ने॑ । अ॒सि॑ ।

आ॒युः॑ । मे॑ । 19 (50)

TS 1.5.5.4

दे॒हि व॒र्चो॒दा अ॒ग्नेऽसि॑ व॒र्चो॒ मे दे॒हि त॒नू॒पा अ॒ग्नेऽसि॑ त॒नु॒वं मे
पा॒ह्य॒ग्ने य॒न्मे त॒नु॒वा ऊ॒नं त॒न्म आ पृ॒ण चि॒त्रा॒व॒सो स्व॒स्ति ते
पा॒र॒म॒शी॒ये॒न्धा॒ना॒स्त्वा श॒त॒म् हि॒मा॒ द्यु॒म॒न्तः॑ स॒मि॒धी॒म॒हि व॒य॒स्व॒न्तो
व॒य॒स्कृ॒तं य॒श॒स्व॒न्तो य॒श॒स्कृ॒त॒म् सु॒वी॒रा॒सो अ॒दा॒भ्यं॑ ।

अ॒ग्ने स॒प॒त्न॒दं॒भ॒नं व॒र्षि॒ष्ठे अ॒धि ना॒के॑ ॥

सं त्व॒म॒ग्ने सूर्य॑स्य॒ व॒र्च॒सा () ऽग॒थाः स॒मृ॒षी॒णा॒म् स्तु॒तेन॑
सं प्रि॒येण॑ धा॒म्ना॑ ।

त्व॒म॒ग्ने सूर्य॑व॒र्चा अ॒सि सं मा॒मा॒यु॒षा व॒र्च॒सा प्र॒जया॑ सृ॒ज ॥ 20

TS 1.5.5.4 (Padam)

दे॒हि । व॒र्चो॒दा इति॑ व॒र्चः- दाः । अ॒ग्ने । अ॒सि । व॒र्चः । मे । दे॒हि ।
त॒नू॒पा इति॑ त॒नू - पाः । अ॒ग्ने । अ॒सि । त॒नु॒व॒म् । मे । पा॒हि ।
अ॒ग्ने । यत् । मे । त॒नु॒वाः । ऊ॒न॒म् । तत् । मे । ए॒ति । पृ॒ण ।
चि॒त्रा॒व॒सो इति॑ चि॒त्र - व॒सो । स्व॒स्ति । ते । पा॒र॒म् । अ॒शी॒य ।
इ॒न्धा॒नाः । त्वा । श॒त॒म् । हि॒माः । द्यु॒म॒न्त इति॑ द्यु- म॒न्तः । स॒मि॒ति ।
इ॒धी॒म॒हि । व॒य॒स्व॒न्तः । व॒य॒स्कृ॒त॒मि॒ति व॒यः-कृ॒त॒म् । य॒श॒स्व॒न्तः ।

य॒श॒स्कृ॒तमि॒ति य॒शः॑ – कृ॒तम् । सु॒वी॒रा॒स इति॑ सु – वी॒रा॒सः ।
 अ॒दा॒भ्यम् ॥ अ॒ग्ने॑ । स॒प॒त्न॒दं॒भ॒नमि॒ति स॒प॒त्न – दं॒भ॒नम् । वर्॒ष्णि॒ष्ठे ।
 अधी॑ति । ना॒के ॥ स॒मि॒ति । त्वम् । अ॒ग्ने॑ । सूर्य॑स्य । वर्च॑सा () ।
 अ॒ग॒थाः । स॒मि॒ति । ऋ॒षी॑णाम् । स्तु॒तेन॑ । स॒मि॒ति । प्रि॒येण॑ ।
 धाम्ना॑ ॥ त्वम् । अ॒ग्ने॑ । सूर्य॑वर्चा इति॑ सूर्य॑ – वर्चाः॑ । अ॒सि॒ ।
 स॒मि॒ति । मा॒म् । आ॒यु॒षा । वर्च॑सा । प्र॒जये॑ति प्र – जया॑ ।

सृ॒ज ॥ 20 (67)

(आ॒हु॒व॒द्ध्यै॑-पोष॑-र॒यिं॑-मे॒-वर्च॑सा-स॒प्त॒द॒श च॑) (A5)

TS 1.5.6.1

सं प॒श्या॑मि प्र॒जा अ॒ह-मि॒डप्र॑जसो मा॒न॒वीः ।

स॒र्वा भ॑वन्तु नो गृ॒हे ॥

अ॒ंभः॑ स्था॒म्भो॑ वो भ॒क्षी॒य महः॑ स्थ महो॑ वो भ॒क्षी॒य सहः॑ स्थ सहो॑

वो भ॒क्षी॒योर्जः॑ स्थोर्जं॑ वो भ॒क्षी॒य रे॒वती॑ र॒म॒ध्व-म॒स्मिन्

लो॒के॑ऽस्मिन् गो॒ष्ठे॑ऽस्मिन् क्ष॒ये॑ऽस्मिन् यो॒ना॒वि॒है॒व स्ते॒तो मा॒ऽप॒ गा॒त

ब॒ह्वी॒र्मे भू॑यास्त – [] 21

TS 1.5.6.1 (Padam)

समि॑ति । प॒श्या॒मि । प्र॒जा इति॑ प्र – जाः । अ॒हम् । इ॒डप्र॑जस
इती॑ड – प्र॒जसः । मा॒नवीः ॥ सर्वाः॑ । भ॒वन्तु॑ । नः । गृ॒हे ॥ अ॒भः ।
स्थ । अ॒म्भः । वः । भ॒क्षीय॑ । म॒हः । स्थ । म॒हः । वः । भ॒क्षीय॑ ।
सहः । स्थ । सहः । वः । भ॒क्षीय॑ । ऊ॒र्जः । स्थ । ऊ॒र्जम् । वः ।
भ॒क्षीय॑ । रेव॑तीः । र॒मद्ध्व॑म् । अ॒स्मिन् । लो॒के । अ॒स्मिन् । गो॒ष्ठ
इति॑ गो-स्थे । अ॒स्मिन् । क्षयै॑ । अ॒स्मिन् । यो॒नौ । इ॒ह । ए॒व ।
स्त । इ॒तः । मा । अ॒पेति॑ । गा॒त । ब॒ह्वीः । मे । भू॒यास्त॑ । 21 (50)

TS 1.5.6.2

स॒ङ्हि॒ताऽसि॑ वि॒श्वरू॒पीरा॑ मो॒र्जा वि॒शा ऽऽ*गौ॒पत्ये॑ना ऽऽ*रा॒यस्पो॑षेण
सह॑स्रपो॒षं वः॑ पु॒ष्यासं॑ मयि॒ वो रा॒यः श्र॑यन्तां ॥
उप॑ त्वा॒ग्ने दि॒वेदि॒वे दो॑षावस्तर्द्धि॒या व॒यं । न॒मो भ॑रन्त॒ एम॑सि ॥
राज॑न्तम॒ध्वरा॑णां गो॒पामृ॑तस्य दी॒दिविं॑ । वर्द्ध॑मान॒स्वे द॑मै ॥
स नः॑ पि॒तेव॑ सू॒नवे॑ग्ने सू॒पाय॑नो भव । सच॑स्वा नः स्व॒स्तये॑ ॥
अ॒ग्ने – [] 22

TS 1.5.6.2 (Padam)

स॒ह॒हि॒ते॒ति॒ सं – हि॒ता । अ॒सि॒ । वि॒श्व॒रू॒पी॒रि॒ति॒ वि॒श्व – रू॒पीः ।
ए॒ति॒ । मा॒ । ऊ॒र्जा॒ । वि॒श॒ । ए॒ति॒ । गौ॒प॒त्ये॒न॒ । ए॒ति॒ । रा॒यः॒ । पो॒षे॒ण॒ ।
स॒ह॒स्र॒पो॒षमि॒ति॒ स॒ह॒स्र – पो॒षम् । वः॒ । पु॒ष्या॒स॒म् । म॒यि॒ । वः॒ ।
रा॒यः॒ । श्र॒य॒न्ता॒म् ॥ उ॒पे॒ति॒ । त्वा॒ । अ॒ग्ने॒ । दि॒वे॒दि॒व॒ इति॒ दि॒वे–दि॒वे॒ ।
दो॒षा॒व॒स्त॒रि॒ति॒ दो॒षा–व॒स्तः॒ । धि॒या॒ । व॒यम् ॥ न॒मः॒ । भ॒र॒न्तः॒ । ए॒ति॒ ।
इ॒म॒सि॒ ॥ रा॒ज॒न्त॒म् । अ॒ध्व॒रा॒णाम्॒ । गो॒पा॒मि॒ति॒ गो–पा॒म् । ऋ॒त॒स्य॒ ।
दी॒दि॒वि॒म् ॥ वर्ध॑मा॒नम् । स्वे॒ । द॒मै॒ ॥ सः॒ । नः॒ । पि॒ता॒ । इ॒व॒ ।
सू॒न॒वै॒ ॥ अ॒ग्ने॒ । सू॒पा॒य॒न॒ इति॒ सु – उ॒पा॒य॒नः॒ । भ॒व॒ ॥ स॒च॒स्व॒ ।
नः॒ । स्व॒स्त॒यै॒ ॥ अ॒ग्ने॒ । 22 (50)

TS 1.5.6.3

त्वं नो॒ अ॒न्त॒मः॒ । उ॒त॒ त्रा॒ता॒ शि॒वो॒ भ॒व॒ व॒रू॒त्थ्यः॒ ॥
तं त्वा॒ शो॒चि॒ष्ठ॒ दी॒दि॒वः॒ । सु॒म्ना॒य॒ नू॒न॒मी॒महे॒ स॒खि॒भ्यः॒ ॥
व॒सु॒र॒ग्नि॒ व॒सु॒श्र॒वाः॒ ।
अ॒च्छा॒ न॒क्षि॒ द्यु॒म॒त्त॒मो॒ र॒यिं॒ दाः॒ ॥

ऊ॒र्जा॒ वः॑ प॒श्या॒म्यूर्जा॑ मा॒ प॒श्य॒त रा॒य॒स्पोषे॑ण॒ वः॑ प॒श्या॒मि रा॒य॒स्पोषे॑ण॒
मा॒ प॒श्य॒ते॒डाः॑ स्थ॒ मधु॑कृतः॒ स्यो॒ना मा॒ ऽवि॑श॒तेरा॒ मदः॑ ।

सह॒स्रपोषं॑ वः॒ पुष्या॑सं – [] 23

TS 1.5.6.3 (Padam)

त्वम् । नः । अ॒न्त॒मः ॥ उ॒त । त्रा॒ता । शि॒वः । भ॒व । व॒रू॒थ्यः ॥ तम् ।
त्वा । शो॒चि॒ष्ठ । दी॒दि॒वः ॥ सु॒म्ना॑य । नू॒नम् । ई॒म॒हे । स॒खि॒भ्य॒ इति॑
स॒खि॒ – भ्यः॑ ॥ व॒सुः । अ॒ग्निः । व॒सु॒श्र॒वा इति॑ व॒सु – श्र॒वाः ॥
अ॒च्छ । न॒क्षि । द्यु॒म॒न्त॒म इति॑ द्यु॒म॒त् – त॒मः । र॒यि॒म् । दाः ॥
ऊ॒र्जा । वः॑ । प॒श्या॒मि । ऊ॒र्जा । मा॒ । प॒श्य॒त । रा॒यः॑ । पो॒षे॒ण । वः॑ ।
प॒श्या॒मि । रा॒यः॑ । पो॒षे॒ण । मा॒ । प॒श्य॒त । इ॒डाः॑ । स्थ॒ । म॒धु॒कृत॑
इति॑ म॒धु – कृतः॑ । स्यो॒नाः । मा॒ । ए॒ति । वि॒श॒त । इ॒राः॑ ।
म॒दः ॥ सह॒स्रपो॒षमि॑ति॒ सह॒स्र – पो॒षम् । वः॑ । पु॒ष्या॑सम् । 23 (50)

TS 1.5.6.4

म॒यि वो॒ रा॒यः॑ श्र॒य॒न्तां ॥
तथ्स॑वि॒तुर्व॑रे॒ण्यं॑ भ॒र्गो दे॒वस्य॑ धी॒महि॑ । धि॒यो यो॒नः॑ प्र॒चो॒दया॑त् ॥
सो॒मान॒॑ स्वर॑णं कृ॒णु॒हि ब्र॑ह्म॒णस्प॑ते । क॒क्षी॒व॒न्तं॑ य॒ औ॒शि॒जं ॥

क॒दा च॒न स्त॒रीर॒सि॒ नेन्द्र॑ स॒श्वसि॑ दा॒शुषे॑ ।
उपो॑पे॒न्नु म॒घव॒न्भूय॑ इ॒न्नु ते॑ दा॒नं दे॒वस्य॑ पृ॒च्यते ॥
परि॑ त्वा॒ग्ने पु॒रं व॒यं वि॒प्रः सह॑स्य धी॒महि॑ ।
धृ॒ष॒द्वर्णं॑ () दि॒वेदि॑वे भे॒त्तारं॑ भ॒ङ्गुरा॑वतः ॥
अ॒ग्ने गृ॒हप॑ते सु॒गृह॑प॒तिर॒हं त्वया॑ गृ॒हप॑तिना भूया॒सः सु॒गृह॑प॒तिर्मया॑
त्वं गृ॒हप॑तिना भूयाः श॒तः हि॒मास्ता॑मा॒शिष॒मा शा॑से तन्त॒वे
ज्योति॑ष्मतीं ता॒माशि॒षमा॑ शा॒से ऽमु॒ष्मै ज्योति॑ष्मतीं ॥ 24

TS 1.5.6.4 (Padam)

मयि॑ । वः । रा॒यः । श्र॒यन्ता॑म् ॥ तत् । स॒वि॒तुः । व॒रेण्य॑म् । भ॒र्गः ।
दे॒वस्य॑ । धी॒महि॑ ॥ धि॒यः । यः । नः । प्र॒चो॒दया॑दिति प्र॒चो॒दया॑त् ॥
सो॒मान॑म् । स्वर॑णम् । कृ॒णु॒हि । ब्र॒ह्म॒णः । प॒ते ॥
कक्षी॑वन्त॒मिति॑ क॒क्षी – व॒न्तम् । यः । औ॒शि॒जम् । क॒दा । च॒न ।
स्त॒रीः । अ॒सि । न । इन्द्र॑ । स॒श्वसि॑ । दा॒शुषे॑ ॥ उपो॑पे॒त्युप॑ – उप॒ ।
इत् । नु । म॒घव॒न्निति॑ म॒घ – व॒न् । भूयः॑ । इत् । नु । ते । दा॒नम् ।
दे॒वस्य॑ । पृ॒च्यते ॥ प॒रीति॑ । त्वा । अ॒ग्ने । पु॒रम् । व॒यम् । वि॒प्रम् ।

स॒हस्य॑ । धी॒महि॑ ॥ धृ॒ष॒द्वर्ण॑मिति धृ॒षत् – वर्ण॑म् () । दि॒वेदि॒व इति॑
 दि॒वे – दि॒वे । भे॒त्ता॒रम् । भ॒ङ्गुरा॑वत इति॑ भ॒ङ्गुर॑-वतः ॥ अ॒ग्ने॑ ।
 गृ॒हप॑त इति॑ गृ॒ह – प॒ते । सु॒गृ॒हप॑तिरिति॑ सु – गृ॒हप॑तिः । अ॒हम् ।
 त्वया॑ । गृ॒हप॑तिनेति॑ गृ॒ह – प॒तिना॑ । भू॒यास॑म् । सु॒गृ॒हप॑तिरिति॑
 सु – गृ॒हप॑तिः । मया॑ । त्वम् । गृ॒हप॑तिनेति॑ गृ॒ह – प॒तिना॑ । भू॒याः ।
 श॒तम् । हि॒माः । ताम् । आ॒शिष॑मित्या॑ – शिष॑म् । एति॑ । शा॒से ।
 तन्त॑वे । ज्योति॑ष्मतीम् । ताम् । आ॒शिष॑मित्या॑ – शिष॑म् । एति॑ ।
 शा॒से । अ॒मुष्मै॑ । ज्योति॑ष्मतीम् ॥ 24 (79)

(भू॒यास्त॑-स्व॒स्तये॑ऽग्ने॑-पु॒ष्यासं॑-धृ॒ष॒द्वर्ण॑-मेका॒न्नत्रि॑ञ्शच्च॑) (A6)

TS 1.5.7.1

अ॒य॒ज्ञो वा ए॒ष यो॑ऽसा॒मोप॑प्र॒यन्तो॑ अ॒ध्वर॑मित्या॒ह स्तो॑ममे॒वास्मै॑
 यु॒न॒क्त्यु॑पेत्या॒ह प्र॒जा वै प॒शव॑ उपे॒मं लो॒कं प्र॒जामे॑व प॒शूनि॑मं
 लो॒कमु॑पै॒त्यस्य॑ प्र॒त्नाम॑नु द्यु॒तमित्या॑ह सु॒वर्गो॑ वै लो॒कः प्र॒त्नः
 सु॒वर्गमे॑व लो॒कञ् समा॑रो॒हत्य॑ग्नि॒मूर्द्धा॑ दि॒वः
 क॒कु॒दित्या॑ह मूर्द्धा॑न- [] 25

TS 1.5.7.1 (Padam)

अ॒य॒ज्ञः॑ । वै । ए॒षः । यः । अ॒सा॒मा । उ॒प॒प्र॒य॒न्त॒ इत्यु॑प – प्र॒य॒न्तः॑ ।
अ॒ध्व॒रम् । इति॑ । आ॒ह॒ । स्तो॒मम्॑ । ए॒व । अ॒स्मै । यु॒न॒क्ति॑ । उ॒पेति॑ ।
इति॑ । आ॒ह॒ । प्र॒जेति॑ प्र – जा । वै । प॒श॒वः॑ । उ॒पेति॑ । इ॒मम् ।
लो॒कम् । प्र॒जा॒मिति॑ प्र – जा॒म् । ए॒व । प॒शून् । इ॒मम् । लो॒कम् ।
उ॒पेति॑ । ए॒ति॒ । अ॒स्य॑ । प्र॒त्ना॒म् । अ॒न्विति॑ । द्यु॒तम्॑ । इति॑ । आ॒ह॒ ।
सु॒व॒र्ग॒ इति॑ सु॒वः – गः॑ । वै । लो॒कः । प्र॒त्नः ।
सु॒व॒र्ग॒मिति॑ सु॒वः – ग॒म् । ए॒व । लो॒कम् । स॒मा॒रो॒ह॒तीति॑
सं – आ॒रो॒ह॒ति॑ । अ॒ग्निः॑ । मूर्द्॒धा । दि॒वः । क॒कुत् । इति॑ । आ॒ह॒ ।
मूर्द्॒धा॒नम्॑ । 25 (50)

TS 1.5.7.2

मे॒वैन॑ꣳ स॒मा॒ना॒नां॑ करोत्यथो दे॒व॒लो॒का॒दे॒व॒ म॒नु॒ष्य॒लो॒के॒ प्रति॑
तिष्ठ॑त्यय॒मिह॑ प्र॒थ॒मो॒ धा॒यि॒ धा॒तृ॒भि॒रि॒त्याह॑ मु॒ख्य॒मे॒वैनं॑ करोत्यु॒भा
वा॒मि॒न्द्रा॒ग्नी॒ आ॒हु॒व॒द्ध्य॒ इत्या॒हौ॒जो॒ ब॒ल॒मे॒वा॒व॒ रु॒न्धे॒ ऽयं॑ ते॒ यो॒निर् ।
ऋ॒त्वि॒य॒ इत्या॒ह॑ प॒श॒वो॒ वै॒ र॒यिः॑ प॒शू॒ने॒वा॒व॒ रु॒न्धे॒ षड्भि॑रु॒प
तिष्ठ॑ते षड्वा – [] 26

TS 1.5.7.2 (Padam)

ए॒व । ए॒नम् । स॒मा॒ना॒नाम् । क॒रो॒ति । अ॒थो इति॑ । दे॒व॒लो॒कादि॑ति
दे॒व – लो॒कात् । ए॒व । म॒नु॒ष्य॒लो॒क इति॑ म॒नु॒ष्य – लो॒के । प्र॒तीति॑ ।
ति॒ष्ठति॑ । अ॒यम् । इ॒ह । प्र॒थमः॑ । धा॒यि । धा॒तृभि॒रिति॑ धा॒तृ – भिः॑ ।
इति॑ । आ॒ह । मु॒ख्यम् । ए॒व । ए॒नम् । क॒रो॒ति । उ॒भा । वा॒म् ।
इ॒न्द्रा॒ग्नी इ॒तीन्द्र॑ – अ॒ग्नी । आ॒हु॒व॒द्ध्यै । इति॑ । आ॒ह । ओ॒जः ।
ब॒लम् । ए॒व । अ॒वेति॑ । रु॒न्धे । अ॒यम् । ते । यो॒निः । ऋ॒त्वि॒यः ।
इति॑ । आ॒ह । प॒श॒वः । वै । र॒यिः । प॒शून् । ए॒व । अ॒वेति॑ । रु॒न्धे ।
ष॒ड्भि॒रिति॑ षट् – भिः॑ । उ॒पेति॑ । ति॒ष्ठते॑ । षट् । वै । 26 (50)

TS 1.5.7.3

ऋ॒त॒व ऋ॒तु॒ष्वे॒व प्र॒ति ति॒ष्ठति॑ ष॒ड्भि॒रु॒त्त॒राभि॒रु॒प ति॒ष्ठते॑ द्वा॒द॒श
सं॒प॒द्य॒न्ते द्वा॒द॒श मा॒साः सँ॒व॒त्स॒रः स॒म्वँ॒त्स॒र ए॒व प्र॒ति ति॒ष्ठति॑ य॒था
वै पु॒रु॒षोऽश्वो॑ गौ॒र्जी॒र्य॒त्ये॒व-म॒ग्नि॒रा॒हि॒तो जी॒र्य॒ति स॒म्वँ॒त्स॒रस्य॑
प॒र॒स्ता॒दा॒ग्नि॒पा॒व॒मा॒नीभि॒रु॒प ति॒ष्ठते॑ पु॒न॒र्न॒व-मे॒वैन॑-म॒ज॒रं क॒रो॒त्यथो॑
पु॒ना॒त्ये॒वो॒प ति॒ष्ठते॑ यो॒ग ए॒वा॒स्यै॒ष उ॒प ति॒ष्ठते॑ – [] 27

TS 1.5.7.3 (Padam)

ऋ॒तवः॑ । ऋ॒तुषु॑ । ऐ॒व । प्र॒तीति॑ । ति॒ष्ठति॑ । षड्भि॑रिति षट् – भिः ।
उत्तरा॑भिरित्युत् – तरा॑भिः । उपेति॑ । ति॒ष्ठते॑ । द्वाद॑श । समि॒ति ।
प॒द्यन्ते॑ । द्वाद॑श । मा॒साः । स॒म्व॑त्स॒र इति॑ सं – व॒त्स॒रः ।
स॒म्व॑त्स॒र इति॑ सं – व॒त्स॒रे । ए॒व । प्र॒तीति॑ । ति॒ष्ठति॑ । यथा॑ । वै ।
पुरु॑षः । अ॒श्वः । गौः । जी॒र्यति॑ । ए॒वम् । अ॒ग्निः ।
आ॒हि॒त इत्या॑ – हि॒तः । जी॒र्यति॑ । स॒म्व॑त्स॒रस्येति॑ सं-व॒त्स॒रस्य॑ ।
पर॑स्तात् । आ॒ग्नि॒पाव॑मा॒नीभि॑रित्या॒ग्नि – पा॒वमा॒नीभिः॑ । उपेति॑ ।
ति॒ष्ठते॑ । पुन॑र्नवमि॒ति पुनः॑-नवम् । ए॒व । ए॒नम् । अ॒जरम्॑ । क॒रोति॑ ।
अथो॑ इति । पु॒नाति॑ । ए॒व । उपेति॑ । ति॒ष्ठते॑ । यो॒गः । ए॒व । अ॒स्य॑ ।
ए॒षः । उपेति॑ । ति॒ष्ठते॑ । 27 (50)

TS 1.5.7.4

द॒म ए॒वा॒स्यैष॑ उप॒ तिष्ठते॑ या॒च्चै॒वा॒स्यैषो॑प॒ तिष्ठते॑ यथा॑ पा॒पीया॑ञ्छ्रे॒यस॑
आ॒हृत्य॑ न॒मस्य॑ति ता॒दृगे॒व तदा॑यु॒र्दा अ॒ग्नेऽस्या॑यु॒र्मे दे॒हीत्या॑हा*ऽऽयु॒र्दा
ह्येष॑ व॒र्चो॒दा अ॒ग्नेऽसि॑ व॒र्चो॒ मे दे॒हीत्या॑ह व॒र्चो॒दा ह्येष॑ त॒नूपा॑
अ॒ग्नेऽसि॑ त॒नुवं॑ मे पा॒हीत्या॑ह – [] 28

TS 1.5.7.4 (Padam)

द॒मः । ए॒व । अ॒स्य । ए॒षः । उ॒पेति॑ । ति॒ष्ठते॑ । या॒च्चै । ए॒व ।
अ॒स्य । ए॒षा । उ॒पेति॑ । ति॒ष्ठते॑ । य॒था॑ । पा॒पी॒यान् । श्रे॒य॒से ।
आ॒ह॒त्येत्या॑ – ह॒त्य । न॒म॒स्यति॑ । ता॒दृक् । ए॒व । तत् ।
आ॒यु॒र्दा इ॒त्यायुः॑ – दाः । अ॒ग्ने । अ॒सि । आ॒युः । मे । दे॒हि । इति॑ ।
आ॒ह । आ॒यु॒र्दा इ॒त्यायुः॑ – दाः । हि । ए॒षः । व॒र्चो॒दा इति॑
व॒र्चः – दाः । अ॒ग्ने । अ॒सि । व॒र्चः । मे । दे॒हि । इति॑ । आ॒ह ।
व॒र्चो॒दा इति॑ व॒र्चः – दाः । हि । ए॒षः । त॒नू॒पा इति॑ त॒नू – पाः ।
अ॒ग्ने । अ॒सि । त॒नु॒वम् । मे । पा॒हि । इति॑ । आ॒ह । 28 (50)

TS 1.5.7.5

त॒नू॒पा ह्ये॒षोऽग्ने॑ य॒न्मे त॒नु॒वा ऊ॒नं त॒न्म आ पृ॒णे॒त्याह॑ य॒न्मे
प्र॒जा॒यै प॒शूना॑मू॒नं त॒न्म आ पू॒रये॑ति वा॒वैत॑दा॒हचि॒त्राव॑सो स्व॒स्ति ते
पा॒र॒म॒शी॒ये॒त्याह॑ रा॒त्रिर्वै चि॒त्राव॑सु॒रव्यु॑ष॒ट्यै वा ए॒तस्यै॑ पु॒रा
ब्रा॒ह्म॒णा अ॒भैषु॑र्व्यु॒ष्टिमे॒वाव रु॒न्ध इ॒न्धा॒नास्त्वा श॒तꣳ – [] 29

TS 1.5.7.5 (Padam)

त॒नू॒पा इति॑ त॒नू – पाः॑ । हि॑ । ए॒षः॑ । अ॒ग्ने॑ । यत् । मे॒ । त॒नु॒वाः॑ ।
ऊ॒नम् । तत् । मे॒ । ए॒ति॑ । पृ॒ण । इति॑ । आ॒ह । यत् । मे॒ । प्र॒जा॒या
इति॑ प्र – जा॒यै॑ । प॒शू॒नाम् । ऊ॒नम् । तत् । मे॒ । ए॒ति॑ । पू॒रय॑ ।
इति॑ । वाव॑ । ए॒तत् । आ॒ह । चि॒त्रा॒व॒सो इति॑ चि॒त्र – व॒सो ।
स्व॒स्ति । ते॒ । पा॒रम् । अ॒शी॒य । इति॑ । आ॒ह । रा॒त्रिः॑ । वै ।
चि॒त्रा॒व॒सु॒रिति॑ चि॒त्र – व॒सुः॑ । अ॒व्यु॒ष्ट्या॑ इत्य॒वि – उ॒ष्ट्यै॑ । वै ।
ए॒तस्यै॑ । पु॒रा । ब्रा॒ह्म॒णाः । अ॒भै॒षुः॑ । व्यु॒ष्टि॒मिति॑ वि – उ॒ष्टिम् । ए॒व ।
अ॒वेति॑ । रु॒न्धे॑ । इ॒न्धा॒नाः । त्वा॒ । श॒तम् । 29 (50)

TS 1.5.7.6

हि॒मा इत्या॑ह श॒ता॒युः॑ पु॒रुषः॑ श॒तेन्द्रि॑य आ॒यु॒ष्ये॒वेन्द्रि॑ये प्र॒ति तिष्ठ॑त्येषा
वै सू॒र्मी क॑र्ण॒का॒व॒त्येत॑या ह स्म॒ वै दे॒वा अ॒सुरा॑णां श॒तत॑र्॒हा
स्तृ॒हन्ति॑ यदे॒तया॑ स॒मिध॑मा॒दधा॑ति व॒ज्रमे॒वैत॑च्छ॒त॒घ्नीं॑ य॒ज॒मा॒नो
भ्रा॒तृ॒व्याय॑ प्र॒हर॑ति स्तृ॒त्या अ॒छं॑ब॒ट्का॒रं सं त्व॑म॒ग्ने सूर्य॑स्य
व॒र्च॑सा॒ऽग॒था इत्या॑है॒त॒त्त्व॑म॒सीद॑म॒हं () भू॒यास॑मि॒ति वा॒वैत॑दा॒ह त्व॑म॒ग्ने
सूर्य॑व॒र्चा अ॒सीत्या॑हा॒ऽऽशि॑षमे॒वैता॑मा शा॒स्ते ॥ 30

TS 1.5.7.6 (Padam)

हि॒माः । इति॑ । आ॒ह । श॒तायु॑रिति॑ श॒त – आ॒युः । पु॒रुषः॑ । श॒तेन्द्रि॑य
इति॑ श॒त – इन्द्रि॑यः । आ॒युषि॑ । ए॒व । इन्द्रि॑ये । प्र॒तीति॑ । तिष्ठ॑ति ।
ए॒षा । वै । सू॒र्मी । क॑र्ण॒काव॑तीति॑ क॑र्ण॒क-व॑ती । ए॒तया॑ । ह॒ । स्म॒ ।
वै । दे॒वाः । अ॒सुरा॑णाम् । श॒त॒तर्॒हानि॑ति॑ श॒त – त॒र्॒हान् ।
तृ॒ह॒न्ति॒ । यत् । ए॒तया॑ । स॒मिध॑मिति॑ सं-इ॒धम् ।
आ॒द॒धा॒तीत्या॑ – द॒धा॒ति॒ । व॒ज्रम् । ए॒व । ए॒तत् । श॒त॒घ्नी॑मिति॑
श॒त – घ्नी॑म् । य॒ज॒मा॒नः । भ्रा॑तृ॒व्याय॑ । प्रेति॑ । ह॒रति॑ । स्तृ॒त्यै ।
अ॒छं॒बट्॒कार॑मित्य॒छं॒बट् – का॒रम् । स॒मिति॑ । त्वम् । अ॒ग्ने । सू॒र्यस्य॑ ।
व॒र्च॑सा । अ॒ग॒थाः । इति॑ । आ॒ह । ए॒तत् । त्वम् । अ॒सि॑ । इ॒दम् ।
अ॒हम् () । भू॒या॒सम् । इति॑ । वा॒व । ए॒तत् । आ॒ह । त्वम् । अ॒ग्ने ।
सू॒र्यव॑र्चा इति॑ सू॒र्य – व॒र्चाः । अ॒सि॑ । इति॑ । आ॒ह ।
आ॒शि॒ष॒मि॒त्या – शि॒षम् । ए॒व । ए॒ताम् । एति॑ । शा॒स्ते ॥ 30 (66)
(मू॒र्ध्ना॒न्-ष॒ड्वा-ए॒ष उप॑ तिष्ठते-पा॒हीत्या॑ह-श॒त-म॒ह
षोड॑श च) (A7)

TS 1.5.8.1

सं प॒श्यामि॑ प्र॒जा अ॒हमि॒त्याह॑ याव॑न्त ए॒व ग्रा॒म्याः प॒शव॑स्ताने॒वाव॑
रु॒न्धेऽम्भः॑ स्था॒म्भो वो॑ भक्षी॒येत्या॒हाम्भो॑ ह्ये॒ता महः॑ स्थ महो॑ वो
भक्षी॒येत्या॒ह महो॑ ह्ये॒ताः सहः॑ स्थ सहो॑ वो भक्षी॒येत्या॒ह सहो॑
ह्ये॒ता ऊ॒र्जः स्थो॒र्जो वो॑ भक्षी॒येत्या॒ – [] 31

TS 1.5.8.1 (Padam)

समि॒ति । प॒श्यामि॑ । प्र॒जा इति॑ प्र – जाः । अ॒हम् । इति॑ । आ॒ह ।
याव॑न्तः । ए॒व । ग्रा॒म्याः । प॒शवः॑ । तान् । ए॒व । अवे॑ति । रु॒न्धे ।
अं॒भः । स्थ । अं॒भः । वः । भक्षी॒य । इति॑ । आ॒ह । अं॒भः । हि ।
ए॒ताः । महः॑ । स्थ । महः॑ । वः । भक्षी॒य । इति॑ । आ॒ह । महः॑ ।
हि । ए॒ताः । सहः॑ । स्थ । सहः॑ । वः । भक्षी॒य । इति॑ । आ॒ह ।
सहः॑ । हि । ए॒ताः । ऊ॒र्जः । स्थ । ऊ॒र्जम् । वः । भक्षी॒य ।
इति॑ । 31 (50)

TS 1.5.8.2

–हो॒र्जो ह्ये॒ता रेव॑ती रम॑द्ध्वमि॒त्याह॑ प॒शवो॑ वै रेव॑तीः प॒शूने॒वात्मन्॑
रम॑यत इ॒हैव॑ स्तेतो॒ माऽप॑ गा॒तेत्या॒ह ध्रु॒वा ए॒वैना॑ अन॒पगाः॑ कुरु॒त

इष्ट॑क॒चिद्वा॑ अ॒न्योऽग्निः॑ प॒शुचि॑दन्यः स॒हि॒तासि॑ वि॒श्वरू॒पीरिति॑
व॒थ्सम॑भि मृ॒शत्यु॑पै॒वैनं॑ ध॒त्ते प॒शुचि॑तमे॒नं कुरु॑ते प्र – [] 32

TS 1.5.8.2 (Padam)

आ॒ह । ऊ॒र्जः । हि । ए॒ताः । रे॒वतीः॑ । र॒म॒ध्वम् । इति॑ । आ॒ह ।
प॒शवः॑ । वै । रे॒वतीः॑ । प॒शून् । ए॒व । आ॒त्मन् । र॒म॒यते॑ । इ॒ह । ए॒व ।
स्त । इ॒तः । मा । अ॒पेति॑ । गा॒त । इति॑ । आ॒ह । ध्रु॒वाः । ए॒व ।
ए॒नाः । अ॒न॒प॒गा इत्य॑न॒प॒गाः । कुरु॑ते । इष्ट॑क॒चिदि॑तीष्ट॒क॒चित् ।
वै । अ॒न्यः । अ॒ग्निः । प॒शुचि॑दिति प॒शु – चि॒त् । अ॒न्यः ।
स॒हि॒तेति॑ सं – हि॒ता । अ॒सि । वि॒श्वरू॒पीरिति॑ वि॒श्व – रू॒पीः ।
इति॑ । व॒थ्सम् । अ॒भीति॑ । मृ॒शति॑ । उ॒पेति॑ । ए॒व । ए॒नम् । ध॒त्ते ।
प॒शुचि॑तमि॒ति प॒शु – चि॒तम् । ए॒नम् । कुरु॑ते । प्रेति॑ । 32 (50)

TS 1.5.8.3

वा ए॒षोऽस्मा॑ल्लो॒काच्च॑यव॒ते य आ॑ह॒वनी॑यमु॒प तिष्ठ॑ते गा॒र्ह॒पत्य॑ –
मु॒पतिष्ठ॑ते ऽस्मि॒न्ने॒व लो॒के प्र॒ति तिष्ठ॑त्यथो गा॒र्ह॒पत्या॑यै॒व नि हु॑ते
गा॒य॒त्रीभि॑रु॒प तिष्ठ॑ते ते॒जो वै गा॑य॒त्री तेज॑ ए॒वात्म॑न् ध॒त्तेऽथो॑ यदे॒तं

तृ॒चम॒न्वाह॒ सन्त॒त्यै॒ गार्.ह॒पत्यं॑ वा॒ अनु॒ द्वि॒पादो॑ वी॒राः प्र॒ जाय॑न्ते
य॒ एवं॑ वि॒द्वान् द्वि॒पदा॑भि॒ गार्.ह॒पत्य॑-मु॒पति॑ष्ठत - [] 33

TS 1.5.8.3 (Padam)

वै । ए॒षः । अ॒स्मात् । लो॒कात् । च्य॒वते॑ । यः ।
आ॒हव॑नी॒यमि॒त्या॑ - ह॒वनी॑यम् । उ॒पति॑ष्ठत इत्यु॒प - ति॑ष्ठते ।
गार्.ह॒पत्य॑मि॒ति गार्.ह॑ - प॒त्यम् । उ॒पेति॑ । ति॒ष्ठते॑ । अ॒स्मिन् ।
ए॒व । लो॒के । प्र॒तीति॑ । ति॒ष्ठति॑ । अथो॒ इति॑ ।
गार्.ह॒पत्या॑येति॒ गार्.ह॑ - प॒त्याय॑ । ए॒व । नी॒ति । हु॒ते । गा॒यत्री॑भिः ।
उ॒पेति॑ । ति॒ष्ठते॑ । तेजः॑ । वै । गा॒यत्री॑ । तेजः॑ । ए॒व । आ॒त्मन् ।
ध॒त्ते । अथो॒ इति॑ । यत् । ए॒तम् । तृ॒चम् । अ॒न्वाहे॑त्यनु - आ॒ह ।
सन्त॒त्या इति॑ सं - त॒त्यै । गार्.ह॒पत्य॑मि॒ति गार्.ह॑ - प॒त्यम् । वै ।
अ॒न्वि॒ति । द्वि॒पाद॑ इति॒ द्वि - पा॑दः । वी॒राः । प्रेति॑ । जा॒यन्ते॑ । यः ।
ए॒वम् । वि॒द्वान् । द्वि॒पदा॑भिरि॒ति द्वि - पदा॑भिः । गार्.ह॒पत्य॑मि॒ति
गार्.ह॑ - प॒त्यम् । उ॒पति॑ष्ठत इत्यु॒प - ति॑ष्ठते । 33 (50)

TS 1.5.8.4

आ॒ऽस्य॑ वी॒रो जा॒यत॑ ऊ॒र्जा वः॑ प॒श्याम्यूर्जा॑ मा प॒श्यते॑त्या॒हा
ऽऽशि॑षमे॒वैता॒मा शा॒स्ते तत्स॑वि॒तुर्वरे॑ण्यमि॒त्याह॑ प्र॒सूत्यै॑ सो॒मान॑ꣳ
स्व॒रणमि॒त्याह॑ सोम॒पीथमे॑वाव रु॒न्धे कृ॑णुहि ब्र॒ह्मण॑स्पत॒ इत्या॑ह
ब्र॒ह्मव॑र्च॒समे॑वाव रु॒न्धे क॒दा च॒न स्त॒रीर॒सीत्या॑ह न स्त॒रीꣳ
रा॒त्रिं व॑सति – [] 34

TS 1.5.8.4 (Padam)

ए॒ति । अ॒स्य । वी॒रः । जा॒यते॑ । ऊ॒र्जा । वः । प॒श्यामि॑ । ऊ॒र्जा ।
मा । प॒श्यत॑ । इति॑ । आ॒ह । आ॒शि॒षमि॒त्या – शि॒षम् । ए॒व ।
ए॒ताम् । ए॒ति । शा॒स्ते । तत् । स॒वि॒तुः । वरे॑ण्यम् । इति॑ । आ॒ह ।
प्र॒सूत्या॑ इति॑ प्र – सू॒त्यै । सो॒मान॑म् । स्व॒रणम् । इति॑ । आ॒ह ।
सोम॒पीथमि॑ति॒ सोम॑ – पी॒थम् । ए॒व । अ॒वेति॑ । रु॒न्धे । कृ॑णुहि ।
ब्र॒ह्मणः॑ । प॒ते । इति॑ । आ॒ह । ब्र॒ह्मव॑र्च॒समि॑ति॒ ब्र॒ह्म-व॑र्च॒सम् । ए॒व ।
अ॒वेति॑ । रु॒न्धे । क॒दा । च॒न । स्त॒रीः । अ॒सि । इति॑ । आ॒ह । न ।
स्त॒रीम् । रा॒त्रिम् । व॑सति॑ । 34 (50)

TS 1.5.8.5

य॒ एवं॑ वि॒द्वान॒ग्नि-मु॒पति॑ष्ठते॒ परि॑ त्वा॒ग्ने पु॒रं व॑यमि॒त्याह॑
परि॒धिमे॒वैतं॑ परि॒ दधा॑त्यस्क॒न्दाया॑ग्ने॒ गृह॑पत॒ इत्या॑ह
यथा॒यजु॑रे॒वैतच्छ॑त॒ हिमा॑ इत्या॒ह श॑तं त्वा हे॒मन्ता॑नि॒न्धिषी॑येति
वा॒वैत॑दाह पु॒त्रस्य॑ नाम॒ गृह्णा॑त्यन्नादमे॒वैनं॑ करोति॒ तामा॑शिष॒मा शा॑से
तन्त॑वे॒ ज्योति॑ष्मती॒मिति॑ ब्रू॒याद्य॑स्य पु॒त्रोऽजा॑तः स्यात् ते॒जस्व्ये॑वा॒स्य
ब्रह्म॑वर्च॒सी पु॒त्रो जा॑यते॒ तामा॑शिष॒मा शा॑से ऽमु॒ष्मै ज्योति॑ष्मती ()
मिति॑ ब्रू॒याद्य॑स्य पु॒त्रो जा॑तः स्यात् ते॒ज ए॒वास्मिन्॑ ब्रह्म॑वर्च॒सं
दधा॑ति ॥ 35

TS 1.5.8.5 (Padam)

यः । ए॒वम् । वि॒द्वान् । अ॒ग्निम् । उ॒पति॑ष्ठत॒ इत्यु॑प – तिष्ठते । परी॑ति ।
त्वा । अ॒ग्ने । पु॒रम् । व॒यम् । इति॑ । आ॒ह । परि॒धिमि॑ति॒ परि-धि॑म् ।
ए॒व । ए॒तम् । परी॑ति । द॒धाति॑ । अ॒स्कन्दा॑य । अ॒ग्ने । गृ॒हप॑त॒ इति॑
गृ॒ह – प॑ते । इति॑ । आ॒ह । य॒थाय॑जु॒रिति॑ यथा – य॒जुः । ए॒व ।
ए॒तत् । श॒तम् । हि॒माः । इति॑ । आ॒ह । श॒तम् । त्वा । हे॒मन्ता॑न् ।
इ॒न्धिषी॑य । इति॑ । वा॒व । ए॒तत् । आ॒ह । पु॒त्रस्य॑ । नाम॑ । गृ॒ह्णाति॑ ।

अ॒न्नाद॒मित्य॑न्न – अ॒दम् । ए॒व । ए॒नम् । क॒रोति॑ । ता॒म् । आ॒शिष॑
मि॒त्या॑-शि॒षम् । ए॒ति । शा॒से । तन्त॑वे । ज्योति॑ष्मतीम् () । इति॑ ।
ब्रू॒यात् । य॒स्य । पु॒त्रः । अ॒जातः॑ । स्या॒त् । ते॒ज॒स्वी । ए॒व । अ॒स्य ।
ब्र॒ह्मव॑र्चसीति॑ ब्र॒ह्म – व॒र्च॒सी । पु॒त्रः । जा॒यते॑ । ता॒म् ।
आ॒शिष॑मि॒त्या॑ – शि॒षम् । ए॒ति । शा॒से । अ॒मुष्मै॑ । ज्योति॑ष्मतीम् ।
इति॑ । ब्रू॒यात् । य॒स्य । पु॒त्रः । जा॒तः । स्या॒त् । ते॒जः । ए॒व ।
अ॒स्मिन् । ब्र॒ह्मव॑र्चसमिति॑ ब्र॒ह्म – व॒र्च॒सम् । द॒धाति॑ ॥ 35 (79)

(ऊ॒र्जँ॑ वो॒ भक्षी॑येति॒-प्र-गा॒र्ह॒प॒त्यमु॒पति॑ष्ठते॒-वस॑ति॒-ज्योति॑ष्मती॒-
मेका॒न्नत्रि॑ञ्शच्च) (A8)

TS 1.5.9.1

अ॒ग्नि॒होत्रं॑ जु॒होति॑ यदे॒व किं॑ च॒ यज॑मानस्य॒ स्वं तस्यै॒व तद्रेतः॑
सिञ्च॑ति प्र॒जन॑ने प्र॒जन॑नञ् हि वा अ॒ग्निर॑थौष॒धीर॑न्त॒गता॑ द॒हति॑
तास्त॑तो भू॒यसीः॑ प्र जा॒यन्ते॑ यथ्सा॒यं जु॒होति॑ रे॒त ए॒व तथ्सि॑ञ्चति॒
प्रैव॑ प्रा॒तस्त॑नेन॒ जन॑यति॒ तद्रेतः॑ सि॒क्तं न त्वष्ट्रा॑ऽवि॒कृतं॑ प्रजा॑यते
याव॑च्छो वै रे॒तसः॑ सि॒क्तस्य॑ – [] 36

TS 1.5.9.1 (Padam)

अ॒ग्नि॒हो॒त्रमि॒त्यग्नि॑ – हो॒त्रम् । जु॒होति॑ । यत् । ए॒व । किम् । च ।
यज॑मानस्य । स्वम् । तस्य॑ । ए॒व । तत् । रे॒तः । सिञ्च॑ति । प्र॒जन॑न
इति॑ प्र – जन॑ने । प्र॒जन॑नमिति॑ प्र – जन॑नम् । हि । वै । अ॒ग्निः ।
अथ॑ । ओष॑धीः । अ॒न्त॒गता॑ इत्य॒न्त – ग॒ताः । द॒हति॑ । ताः । ततः॑ ।
भूय॑सीः । प्रेति॑ । जा॒य॒न्ते । यत् । सा॒यम् । जु॒होति॑ । रे॒तः । ए॒व ।
तत् । सिञ्च॑ति । प्रेति॑ । ए॒व । प्रा॒त॒स्त॒नेनेति॑ प्रा॒तः – त॒नेन॑ ।
ज॒न॒यति॑ । तत् । रे॒तः । सि॒क्तम् । न । त्वष्ट्रा॑ ।
अ॒वि॒कृत॑मि॒त्यवि॑ – कृत॑म् । प्रेति॑ । जा॒य॒ते । या॒वच्छ॑ इति॑
यावत् – शः । वै । रे॒त॒सः । सि॒क्तस्य॑ । 36 (50)

TS 1.5.9.2

त्वष्ट्रा॑ रूपाणि वि॒करो॑ति ता॒वच्छो॑ वै तत्प्र जा॒य॒त ए॒ष वै दै॒व्यस्त्वष्ट्रा॑
यो यज॑ते ब॒ह्वीभि॑रुप तिष्ठ॑ते रे॒त॒स ए॒व सि॒क्तस्य॑ बहु॒शो रूपाणि॑ वि
करो॑ति स प्रै॒व जा॒य॒ते श्वःश्चो॑ भू॒यान् भव॑ति य ए॒वं
ॐ वि॒द्वान॒ग्निमु॑पतिष्ठ॑ते ऽह॒र्दे॒वाना॑मासीद्-रा॒त्रिर॒सुरा॑णां तेऽसुरा॑ यद्दे॒वानां॑
ॐ वि॒त्तं ॐ वे॒द्यमा॑सी॒त्तेन॑ सह- [] 37

TS 1.5.9.2 (Padam)

त्वष्टा॑ । रूपाणि॑ । वि॒करो॑तीति॑ वि – करो॑ति । ताव॑च्छ इति॑
तावत्-शः॑ । वै । तत् । प्रेति॑ । जा॒यते॑ । ए॒षः । वै । दै॒व्यः । त्वष्टा॑ ।
यः । यज॑ते । ब॒ह्वीभिः॑ । उपेति॑ । तिष्ठ॑ते । रे॒तसः॑ । ए॒व । सि॒क्तस्य॑ ।
ब॒हुश॑ इति॑ बहु – शः । रूपाणि॑ । वीति॑ । करो॑ति । सः । प्रेति॑ ।
ए॒व । जा॒यते॑ । श्वःश्च॑ इति॑ श्वः – श्वः । भू॒यान् । भव॑ति । यः ।
ए॒वम् । वि॒द्वान् । अ॒ग्निम् । उप॑तिष्ठ॑त इत्यु॑प – तिष्ठ॑ते । अ॒हः ।
दे॒वानाम्॑ । आसी॑त् । रा॒त्रिः । अ॒सुरा॑णाम् । ते । अ॒सुराः॑ ।
यत् । दे॒वानाम्॑ । वि॒त्तम् । वे॒द्यम् । असी॑त् । तेन॑ । स॒ह । 37 (50)

TS 1.5.9.3

रा॒त्रिं प्रा॑ऽवि॒शन्ते॑ दे॒वा ही॒ना अ॑म॒न्यन्त॑ तेऽप॑श्यन्नाग्नेयी रा॒त्रिरा॑ग्नेयाः
प॒शव॑ इ॒ममे॒वाग्नि॑ स्त॒वाम॑ स नः॑ स्तु॒तः प॒शून् पुन॑र्दास्यतीति॑
तेऽग्नि॑मस्तु॒वन्त्स ए॒भ्यः स्तु॒तो रा॒त्रिया॑ अ॒ध्यह॑रभि प॒शून्नि॑रार्ज॒ते
दे॒वाः प॒शून् वि॒त्त्वा का॒मा अ॑कुर्व॒त य ए॒वं वि॒द्वान॑ग्निमु॒पति॑ष्ठ॒ते
प॒शुमान्॑ भव- [] 38

TS 1.5.9.3 (Padam)

रा॒त्रि॒म् । प्रे॒ति॒ । अ॒वि॒श॒न् । ते॒ । दे॒वाः । ही॒नाः । अ॒म॒न्य॒न्त॒ । ते॒ ।
अ॒प॒श्य॒न् । आ॒ग्ने॒यी॒ । रा॒त्रिः॑ । आ॒ग्ने॒याः॑ । प॒श॒वः॑ । इ॒मम् । ए॒व ।
अ॒ग्नि॒म् । स्त॒वा॒म॒ । सः॑ । नः॑ । स्तु॒तः॑ । प॒शून् । पुनः॑ । दा॒स्य॒ति॒ ।
इति॑ । ते॒ । अ॒ग्नि॒म् । अ॒स्तु॒व॒न् । सः॑ । ए॒भ्यः॑ । स्तु॒तः॑ । रा॒त्रि॒याः॑ ।
अ॒धी॒ति॒ । अ॒हः॑ । अ॒भी॒ति॒ । प॒शून् । नि॒रि॒ति॒ । आ॒र्ज॒त् । ते॒ । दे॒वाः ।
प॒शून् । वि॒त्त्वा । का॒मा॒न् । अ॒कु॒र्व॒त॒ । यः॑ । ए॒वम् । वि॒द्वान् ।
अ॒ग्नि॒म् । उ॒प॒ति॒ष्ठ॒त॒ इत्यु॑प – तिष्ठ॑ते । प॒शु॒मा॒नि॒ति॒ प॒शु – मा॒न् ।

भव॑ति । 38 (50)

TS 1.5.9.4

त्यादि॑त्यो वा अ॒स्मा॒ल्लो॒का॒द॒मुं॑ लो॒क॒मै॒त्सो॑ ऽमुं॑ लो॒कं॑ ग॒त्वा पुन॑रि॒मं
लो॒क॒म॒भ्य॑द्ध्य॒य॒थ् स इ॒मं॑ लो॒क॒मा॒ग॒त्य॑ मृ॒त्यो॒र॒बि॒भे॒न्मृ॒त्यु॒सं॑यु॒त
इ॒व ह्य॑यं लो॒कः॑ सोऽम॒न्य॒ते॒म॒मे॒वा॒ग्नि॑ः स्त॒वा॒नि स मा॑ स्तु॒तः
सु॒व॒र्गं लो॒कं॑ ग॒म॒यि॒ष्य॒ती॒ति॒ सोऽग्नि॑म॒स्तौ॒थ् स ए॒न॑ः स्तु॒तः सु॒व॒र्गं
लो॒क॒म॒ग॒म॒य॒द्य॒ – [] 39

TS 1.5.9.4 (Padam)

आ॒दि॒त्यः । वै । अ॒स्मात् । लो॒कात् । अ॒मुम् । लो॒कम् । ऐ॒त् । सः ।
अ॒मुम् । लो॒कम् । ग॒त्वा । पुनः॑ । इ॒मम् । लो॒कम् । अ॒भी॒ति॑ ।
अ॒द्ध्य॒या॒यत् । सः । इ॒मम् । लो॒कम् । आ॒ग॒त्ये॒त्या॑ – ग॒त्य॑ । मृ॒त्योः ।
अ॒बि॒भे॒त् । मृ॒त्यु॒स॒म्यु॒त॒ इति॑ मृ॒त्यु॒-स॒म्यु॒तः । इ॒व । हि । अ॒यम् ।
लो॒कः । सः । अ॒म॒न्य॒त॒ । इ॒मम् । ए॒व । अ॒ग्नि॒म् । स्त॒वा॒नि॒ । सः ।
मा । स्तु॒तः । सु॒व॒र्ग॒मि॒ति॑ सु॒वः-ग॒म् । लो॒कम् । ग॒म॒यि॒ष्य॒ति॒ । इति॑ ।
सः । अ॒ग्नि॒म् । अ॒स्तौ॒त् । सः । ए॒नम् । स्तु॒तः ।
सु॒व॒र्ग॒मि॒ति॑ सु॒वः – ग॒म् । लो॒कम् । अ॒ग॒म॒य॒त् । यः । 39 (50)

TS 1.5.9.5

ए॒वं वि॒द्वान॒ग्नि॒मु॒प॒ति॒ष्ठ॒ते॑ सु॒व॒र्ग॒मे॒व लो॒क॒मे॒ति॒ स॒र्व॒मा॒यु॒रे॒त्य॒भि॒
वा ए॒षो॒ऽग्नी॑ आ रो॒ह॒ति॒ य ए॒नावु॒प॒ति॒ष्ठ॒ते॑ यथा॒ खलु॒ वै
श्रे॒या॒न॒भ्या॒रू॒ढः॑ का॒म॒य॒ते॒ तथा॑ क॒रो॒ति॒ न॒क्त॒मु॒प॒ ति॒ष्ठ॒ते॑ न प्रा॒तः
सꣳ हि न॒क्तं॑ व्र॒तानि॑ सृ॒ज्य॒न्ते॑ स॒ह श्रे॒याꣳश्च॑ पा॒पी॒याꣳ श्रा॒सा॒ते॒
ज्यो॒ति॒र्वा अ॒ग्नि॒स्त॒मो रा॒त्रि॒र्य॒ – [] 40

TS 1.5.9.5 (Padam)

ए॒वम् । वि॒द्वान् । अ॒ग्निम् । उ॒प॒ति॒ष्ठ॒त इत्यु॑प – ति॒ष्ठ॒ते । सु॒व॒र्ग॒मि॒ति॑
सु॒वः – ग॒म् । ए॒व । लो॒कम् । ए॒ति॒ । स॒र्वम् । आ॒युः । ए॒ति॒ ।
अ॒भी॒ति॑ । वै । ए॒षः । अ॒ग्नी इति॑ । ए॒ति॒ । रो॒ह॒ति॒ । यः । ए॒नौ ।
उ॒प॒ति॒ष्ठ॒त इत्यु॑प – ति॒ष्ठ॒ते । य॒था॑ । ख॒लु । वै । श्रे॒या॒न् ।
अ॒भ्या॒रूढ इत्य॑भि – आ॒रूढः॑ । का॒म॒य॒ते । त॒था॑ । क॒रो॒ति॒ । न॒क्तम्॑ ।
उ॒पे॒ति॑ । ति॒ष्ठ॒ते । न । प्रा॒तः । स॒मि॒ति॑ । हि । न॒क्तम्॑ । व्र॒ता॒नि॑ ।
सृ॒ज्यन्ते॑ । स॒ह । श्रे॒या॒न् । च॒ । पा॒पी॒या॒न् । च॒ । आ॒सा॒ते इति॑ ।
ज्यो॒तिः॑ । वै । अ॒ग्निः॑ । त॒मः॑ । रा॒त्रिः॑ । यत् । 40 (50)

TS 1.5.9.6

न॒क्त॒मु॒प॒ति॒ष्ठ॒ते ज्यो॒ति॒षै॒व त॒म॒स्तर॑त्यु॒प॒स्थे॒योऽग्नी॑(३) नो॒प॒स्थे॒या(३)
इ॒त्याहु॑र्म॒नु॒ष्या॒ये॒न्वै योऽह॑र॒ह॒त्याऽथै॒नं॑ या॒च॒ति॒ स इ॒न्वै
त॒मु॒पा॒र्च्छ॑त्य॒थ को॑ दे॒वान॑ह॒र॒ह॒र्या॒चि॒ष्य॒तीति॑ त॒स्मान्नो॑प॒स्थे॒योऽथो॑
ख॒ल्वाहु॑रा॒शि॒षे वै कं॑ या॒ज॒मा॒नो य॒ज॒त इत्ये॒षा ख॒लु वा – [] 41

TS 1.5.9.6 (Padam)

न॒क्तम् । उ॒प॒ति॒ष्ठ॒त इत्यु॒प – ति॒ष्ठ॒ते । ज्यो॒ति॒षा । ए॒व । त॒मः । त॒र॒ति ।
उ॒प॒स्थे॒य इत्यु॒प – स्थे॒यः । अ॒ग्नी(३)ः । न । उ॒प॒स्थे॒या(३)
इत्यु॒प-स्थे॒या(३)ः । इति । आ॒हुः । म॒नु॒ष्या॒य । इत् । नु । वै । यः ।
अ॒ह॒र॒ह॒रि॒त्य॒हः – अ॒हः । आ॒ह॒त्ये॒त्या – ह॒त्य । अथ । ए॒न॒म् ।
या॒च॒ति । सः । इत् । नु । वै । तम् । उ॒पे॒ति । ऋ॒च्छ॒ति । अथ ।
कः । दे॒वान् । अ॒ह॒र॒ह॒रि॒त्य॒हः-अ॒हः । या॒चि॒ष्य॒ति । इति । तस्मा॑त् ।
न । उ॒प॒स्थे॒य इत्यु॒प – स्थे॒यः । अथो॒ इति । ख॒लु । आ॒हुः ।
आ॒शि॒ष इत्या – शि॒षे । वै । कम् । य॒ज॒मा॒नः । य॒ज॒ते । इति ।
ए॒षा । ख॒लु । वै । 41 (50)

TS 1.5.9.7

आ॒हि॒ता॒ग्ने॒रा॒शी र्यद॒ग्नि॒मु॒प॒ति॒ष्ठ॒ते तस्मा॑दु॒प॒स्थे॒यः प्र॒जा॒प॒तिः
प॒शू॒न॒सृ॒ज॒त ते सृ॒ष्टा अ॒हो॒रा॒त्रे प्रा॒ऽवि॒श॒न् ताञ्छ॑न्द्वा॒भि-र॒न्व॒वि॒न्द॒द्-
य॒च्छ॑न्द्वा॒भि-रु॒प॒ति॒ष्ठ॒ते स्व॒मे॒व तद॑न्वि॒च्छ॒ति न तत्र॑ जा॒म्य॒स्ती-
त्या॒हु॒र्यो ऽह॑र॒ह॒रु॒प ति॒ष्ठ॒त इति॑ यो वा अ॒ग्निं प्र॒त्यङ्ङु॒प ति॒ष्ठ॒ते
प्र॒त्ये॒न॒मो॒ष॒ति यः प॒राङ् वि॒ष्वङ् प्र॒ज॒या प॒शु॒भि () रेति॑

क॒वा॒ति॒र्य॒ङ्ङि॒वो॒प॒ ति॒ष्ठे॒त॒ नैनं॑ प्र॒त्यो॒ष॒ति॒ न वि॒ष्व॒ङ्

प्र॒ज॒या॒ प॒शु॒भि॒रे॒ति॒ ॥ 42

TS 1.5.9.7 (Padam)

आ॒हि॒ता॒ग्ने॒रि॒त्या॒हि॒त॒-अ॒ग्नेः॑ । आ॒शी॒रि॒त्या॑ - शीः॑ । यत् । अ॒ग्नि॒म् ।

उ॒प॒ति॒ष्ठ॒त॒ इत्यु॑प - ति॒ष्ठ॒ते॒ । तस्मा॑त् । उ॒प॒स्थे॒य॒ इत्यु॑प - स्थे॒यः॑ ।

प्र॒जा॒प॒ति॒रि॒ति॒ प्र॒जा - प॒तिः॑ । प॒शून् । अ॒सृ॒ज॒त॒ । ते । सृ॒ष्टाः॑ ।

अ॒हो॒रा॒त्रे॒ इत्य॑हः - रा॒त्रे । प्रे॒ति॒ । अ॒वि॒श॒न् । तान् । छ॒न्दो॑भि॒रि॒ति॒

छ॒न्दः-भिः॑ । अ॒न्वि॒ति॒ । अ॒वि॒न्द॒त् । यत् । छ॒न्दो॑भि॒रि॒ति॒ छ॒न्दः-भिः॑ ।

उ॒प॒ति॒ष्ठ॒त॒ इत्यु॑प - ति॒ष्ठ॒ते॒ । स्व॒म् । ए॒व । तत् । अ॒न्वि॒ति॒ । इ॒च्छ॒ति॒ ।

न । तत्र॑ । जा॒मि॒ । अ॒स्ति॒ । इति॑ । आ॒हुः॑ । यः ।

अ॒ह॒र॒ह॒रि॒त्य॑हः - अ॒हः॑ । उ॒प॒ति॒ष्ठ॒त॒ इत्यु॑प - ति॒ष्ठ॒ते॒ । इति॑ । यः ।

वै । अ॒ग्नि॒म् । प्र॒त्य॒ङ्ङि॒ । उ॒प॒ति॒ष्ठ॒त॒ इत्यु॑प - ति॒ष्ठ॒ते॒ । प्र॒ती॒ति॒ । ए॒न॒म् ।

ओ॒ष॒ति॒ । यः । प॒रा॒ङ् । वि॒ष्व॒ङ्ङि॒ । प्र॒ज॒ये॒ति॒ प्र - ज॒या॑ । प॒शु॒भि॒रि॒ति॒

प॒शु - भिः॑ () । ए॒ति॒ । क॒वा॒ति॒र्य॒ङ्ङि॒ति॒ क॒वा - ति॒र्य॒ङ्ङि॒ । इ॒व ।

उ॒पे॒ति॒ । ति॒ष्ठे॒त॒ । न । ए॒न॒म् । प्र॒त्यो॒ष॒ती॒ति॒ प्र॒ति - ओ॒ष॒ति॒ । न ।

विष्वङ् । प्र॒जये॑ति प्र – जया॑ । प॒शुभि॑रिति प॒शु – भिः॑ ।

ए॒ति ॥ 42 (63) (सि॒क्तस्य॑-स॒ह-भ॑वति-यो-यत्-ख॒लु वै-प॒शुभि-
स्त्रयो॑दश च) (A9)

TS 1.5.10.1

मम॑ नाम॑ प्रथ॒मं जा॑तवेदः पि॒ता मा॒ता च॑ दध॒तुर्यद॑ग्रे ।

तत्त्वं बि॑भृहि पुन॒रा मदै॑तोस्तवा॒हं नाम॑ बिभ॒राण्यग्ने॑ ॥

मम॑ नाम॑ तव॑ च जा॒तवे॑दो वा॒ससी॑ इव वि॒वसा॑नौ ये च॒रावः॑ ।

आयु॑षे त्वं जी॒वसे॑ वयं॑ यथा॒यथं॑ वि॒ परि॑ दधा॒वहै॑ पुन॒स्ते ॥

नमो॑ऽग्नये॑ ऽप्र॒तिवि॑द्वाय॒ नमो॑ऽना॒धृष्टा॑य॒ नमः॑ स॒म्राजे॑ ।

अ॒षाढो – [] 43

TS 1.5.10.1 (Padam)

मम॑ । नाम॑ । प्र॒थम॑म् । जा॒तवे॑द इति॑ जा॒त – वे॒दः । पि॒ता । मा॒ता ।

च । दध॒तुः । यत् । अ॒ग्रे ॥ तत् । त्वम् । बि॒भृहि॑ । पुनः॑ । ए॒ति ।

मत् । ऐ॒तो॒रित्या॑ – ए॒तोः॑ । तव॑ । अ॒हम् । नाम॑ । बि॒भ्रा॒णि ।

अ॒ग्ने ॥ मम॑ । नाम॑ । तव॑ । च । जा॒तवे॑द इति॑ जा॒त – वे॒दः ।

वा॒ससी॑ इति॑ । इ॒व । वि॒वसा॑ना॒विति॑ वि-वसा॑नौ । ये इति॑ । च॒रावः॑ ॥

आ॒यु॒षे । त्व॒म् । जी॒व॒से । व॒य॒म् । य॒था॒य॒थ॒मि॒ति॒ य॒था॒-य॒थ॒म् । वि॒ ।
प॒री॒ति॒ । द॒धा॒व॒है । पु॒नः॑ । ते इति॑ ॥ न॒मः॑ । अ॒ग्न॒ये॑ ।
अ॒प्र॒ति॒वि॒द्वा॒ये॒त्य॒प्र॒ति॒ - वि॒द्वा॒य॒ । न॒मः॑ । अ॒ना॒धृ॒ष्टा॒ये॒त्य॒ना॑ - धृ॒ष्टा॒य॒ ।
न॒मः॑ । स॒म्रा॒ज इति॑ सं - रा॒जे॑ ॥ अ॒षा॒ढः । 43 (50)

TS 1.5.10.2

अ॒ग्नि॒र्बृ॒ह॒द्व॒या वि॒श्व॒जि॒त्स॒ह॒न्त्यः॑ श्रे॒ष्ठो ग॒न्ध॒र्वः॑ ॥
त्व॒त्पि॒ता॒रो अ॒ग्ने दे॒वा-स्त्वा॒मा॒हु॒त॒य-स्त्व॒द्वि॒वा॒च॒नाः॑ ।
सं मा॒मा॒यु॒षा सं गौ॒प॒त्ये॒न सु॒हि॒ते मा॒ धाः॑ ॥
अ॒य॒म॒ग्निः॑ श्रे॒ष्ठ॒त॒मो॒ ज्यं॑ भ॒ग॒व॒त्त॒मो॒ ज्य॒ञ् सह॒स्र॒सा॒त॒मः॑ ।
अ॒स्मा अ॒स्तु सु॒वी॒र्यं॑ ॥
म॒नो ज्यो॒ति॒ र्जु॒ष॒ता॒मा॒ज्यं॑ वि॒च्छि॒न्नं य॒ज्ञ॒ञ् स॒मि॒मं द॒धातु॑ ।
या इ॒ष्टा उ॒ष॒सो नि॒मृ॒च॒श्च ताः॑ सं द॒धामि॑ ह॒वि॒षा घृ॒ते॒न॑ ॥
प॒य॒स्व॒ती॒रो॒ष॒ध॒यः॑ - [] 44

TS 1.5.10.2 (Padam)

अ॒ग्निः॑ । बृ॒ह॒द्व॒या इति॑ बृ॒ह॒त् - व॒याः॑ । वि॒श्व॒जि॒दि॒ति॒ वि॒श्व - जि॒त् ।
स॒ह॒न्त्यः॑ । श्रे॒ष्ठः॑ । ग॒न्ध॒र्वः॑ ॥ त्व॒त्पि॒ता॒र इति॑ त्व॒त्-पि॒ता॒रः॑ । अ॒ग्ने॒ ।

दे॒वाः । त्वा॒माहु॒तय॒ इति॒ त्वा॒म् – आ॒हु॒तयः॑ । त्व॒द्वि॒वा॒च॒ना इति॑
त्वत् – वि॒वा॒च॒नाः ॥ स॒मि॒ति॑ । मा॒म् । आ॒यु॒षा । स॒मि॒ति॑ । गौ॒प॒त्ये॒न ।
सु॒हि॒त इति॑ सु – हि॒ते । मा॒ । धाः ॥ अ॒यम् । अ॒ग्निः ।
श्रे॒ष्ठ॒त॒म इति॑ श्रे॒ष्ठ – त॒मः । अ॒यम् । भ॒ग॒व॒त्त॒म इति॑ भ॒ग॒व॒त्-त॒मः ।
अ॒यम् । स॒ह॒स्र॒सा॒त॒म इति॑ स॒ह॒स्र – सा॒त॒मः ॥ अ॒स्मै । अ॒स्तु ।
सु॒वी॒र्य॒मि॒ति सु – वी॒र्य॑म् ॥ म॒नः । ज्यो॒तिः । जु॒ष॒ता॒म् । आ॒ज्य॑म् ।
वि॒च्छि॒न्न॒मि॒ति वि – छि॒न्न॒म् । य॒ज्ञ॒म् । स॒मि॒ति॑ । इ॒मम् । द॒धा॒तु ॥
याः । इ॒ष्टाः । उ॒ष॒सः । नि॒मृ॒च इति॑ नि-मृ॒चः । च॒ । ताः । स॒मि॒ति॑ ।
द॒धा॒मि । ह॒वि॒षा । घृ॒ते॒न ॥ प॒य॒स्व॒तीः । ओ॒ष॒ध॒यः । 44 (50)

TS 1.5.10.3

प॒य॒स्व॒द्वी॒रु॒धां प॒यः॑ ।
अ॒पां प॒य॒सो य॒त्प॒य॒स्ते॒न मा॒मि॒न्द्र स॒ꣳ सृ॒ज ॥
अ॒ग्ने॑ व्र॒त॒प॒ते व्र॒तं च॒रि॒ष्या॒मि त॒च्छ॒के॒यं त॒न्मे रा॒द्ध्य॒तां ॥
अ॒ग्नि॑ꣳ हो॒ता॒र॒मि॒ह त॒ꣳ हु॒वे दे॒वान् य॒ज्ञि॒या॒नि॒ह या॒न् ह॒वा॒म॒हे ॥
आ य॒न्तु दे॒वाः सु॒म॒न॒स्य॒मा॒ना वि॒य॒न्तु दे॒वा ह॒वि॒षो मे अ॒स्य ॥

क॒स्त्वा यु॒नक्ति॑ स॒ त्वा यु॒नक्तु॑ या॒नि घ॒र्मे

क॒पा॒ला॒न्युप॑चि॒न्वन्ति॑-[] 45

TS 1.5.10.3 (Padam)

प॒यस्व॑त् । वी॒रु॒धाम् । प॒यः । अ॒पाम् । प॒यसः॑ । य॒त् । प॒यः ॥ ते॒न ।

मा॒म् । इ॒न्द्र । स॒मि॒ति । सृ॒ज ॥ अ॒ग्ने । व्र॒त॒प॒त इति॑ व्र॒त – प॒ते ।

व्र॒तम् । च॒रि॒ष्या॒मि । त॒त् । श॒के॒यम् । त॒त् । मे॒ । रा॒द्ध्य॒ताम् ॥

अ॒ग्नि॒म् । हो॒तार॑म् । इ॒ह । त॒म् । हु॒वे । दे॒वान् । य॒ज्ञि॒यान् । इ॒ह ।

या॒न् । ह॒वाम॑हे ॥ ए॒ति । य॒न्तु । दे॒वाः । सु॒म॒न॒स्य॑मा॒ना इति॑

सु – म॒न॒स्य॑मा॒नाः । वि॒यन्तु॑ । दे॒वाः । ह॒विषः॑ । मे॒ । अ॒स्य ॥ कः ।

त्वा । यु॒नक्ति॑ । सः । त्वा । यु॒नक्तु॑ । या॒नि । घ॒र्मे । क॒पा॒ला॒नि ।

उ॒प॒चि॒न्वन्ती॑त्यु॒प – चि॒न्वन्ति॑ । 45 (50)

TS 1.5.10.4

वे॒धसः॑ ।

पू॒ष्ण॒स्ता॒न्यपि॑ व्र॒त इ॒न्द्र॒वा॒यू वि॑ मुञ्च॒तां ॥

अ॒भि॒न्नो घ॒र्मो जी॒र॒दा॒नु॒र्य॒त आ॒त्त॒स्त॒द॒गन् पु॒नः ।

इ॒द्ध॒मो वे॒दिः प॒रि॒धय॑श्च॒ सर्वे॑ य॒ज्ञ॒स्याऽऽयु॑र॒नु सं च॑रन्ति ॥

त्रयस्त्रिंशत् तन्तवो ये वितन्निरे य इमं यज्ञं स्वधया ददन्ते
तेषां छिन्नं प्रत्येतदधामि स्वाहा घर्मो देवां अप्येतु ॥ 46

TS 1.5.10.4 (Padam)

वेधसः ॥ पूष्णः । तानि । अपीति । व्रते । इन्द्रवायू इतीन्द्र – वायू ।
वीति । मुञ्चताम् ॥ अभिन्नः । घर्मः । जीरदानुरिति जीर – दानुः ।
यतः । आन्तः । तत् । अगन् । पुनः ॥ इद्धम् । वेदिः । परिधय
इति परि – धयः । च । सर्वे । यज्ञस्य । आयुः । अनु । समिति ।
चरन्ति ॥ त्रयस्त्रिंशदिति त्रयः – त्रिंशत् । तन्तवः । ये । वितन्निरे
इति वि – तन्निरे । ये । इमम् । यज्ञम् । स्वधयेति स्व – धया ।
ददन्ते । तेषाम् । छिन्नम् । प्रतीति । एतत् । दधामि ।
स्वाहा । घर्मः । देवान् । अपीति । एतु ॥ 46 (45)

(अषाढ-ओषधय-उपचिन्वन्ति-पञ्चचत्वारिंशच्च) (A10)

TS 1.5.11.1

वैश्वानरो न ऊत्याऽऽ प्र यातु परावतः । अग्निरुक्थेन वाहसा ॥
ऋतावानं वैश्वानरमृतस्य ज्योतिषस्पतिं । अजस्रं घर्ममीमहे ॥
वैश्वानरस्य दसनाभ्यो बृहदरिणादेकः स्वपस्यया कविः ।

उ॒भा पि॒तरा॑ म॒हय॑न्नजायताग्नि॒ द्या॒वापृ॑थि॒वी भू॒रिरे॑तसा ॥

पृ॒ष्ठो दि॒वि पृ॒ष्ठो अ॒ग्निः पृ॒थि॒व्यां पृ॒ष्ठो वि॒श्वा ओष॑धी॒रा वि॒वेश॑ ।

वै॒श्वा॒नरः॑ स॒हसा॑ पृ॒ष्ठो अ॒ग्निः स॒नो दि॒वा स – [] 47

TS 1.5.11.1 (Padam)

वै॒श्वा॒नरः॑ । नः॑ । ऊ॒त्या । आ । प्रे॒ति । या॒तु ।

प॒रा॒वत॑ इति॒ प॒रा – व॑तः ॥ अ॒ग्निः । उ॒क्थे॑न । वा॒ह॒सा ॥

ऋ॒तावा॑न॒मित्यृ॑त–वा॒नम् । वै॒श्वा॒नर॑म् । ऋ॒तस्य॑ । ज्यो॒तिषः॑ । प॒तिम् ॥

अ॒ज॒स्रम् । घ॒र्मम् । ई॒महे॑ ॥ वै॒श्वा॒नर॑स्य । द॒स॒नाभ्यः॑ । बृ॒हत् ।

अ॒रि॒णात् । ए॒कः । स्व॒प॒स्यये॑ति सु – अ॒प॒स्यया॑ । क॒विः ॥ उ॒भा ।

पि॒तरा॑ । म॒हय॑न् । अ॒जा॒यत॑ । अ॒ग्निः । द्या॒वापृ॑थि॒वी इति॑

द्या॒वा–पृ॑थि॒वी । भू॒रिरे॑त॒सेति॑ भू॒रि – रे॒तसा॑ ॥ पृ॒ष्ठः । दि॒वि । पृ॒ष्ठः ।

अ॒ग्निः । पृ॒थि॒व्याम् । पृ॒ष्ठः । वि॒श्वाः॑ । ओष॑धीः । ए॒ति । वि॒वेश॑ ॥

वै॒श्वा॒नरः॑ । स॒हसा॑ । पृ॒ष्ठः । अ॒ग्निः । सः॑ । नः॑ ।

दि॒वा । सः॑ । 47 (50)

TS 1.5.11.2

रिषः॑ पा॒तु न॑क्तं॑ ॥

जा॒तो यद॑ग्ने॒ भुव॑ना व्य॒ख्यः प॒शुं न गो॒पा इ॒र्यः परि॑ज्मा ।

वैश्वा॑नर॒ ब्रह्म॑णे वि॒न्द गा॒तुं यू॒यं पा॒त स्व॒स्तिभिः॑ सदा॑ नः ॥

त्वम॑ग्ने शो॒चिषा॑ शो॒शुचा॑न आ रोद॑सी अपृ॒णा जा॑यमानः ।

त्वं दे॒वाँ अ॒भि॒शस्ते॑रमु॒ञ्चो वैश्वा॑नर जा॒तवे॑दो म॒हित्वा ॥

अस्मा॑कम॒ग्ने म॒घव॑त्सु धा॒रया॑नामि क्ष॒त्रम॒जर॑ँ सु॒वीर्यं॑ ।

वयं॑ जये॒म श॒तिन॑ँ सह॒स्रिणं॑ वैश्वा॑नर – [] 48

TS 1.5.11.2 (Padam)

रिषः॑ । पा॒तु । न॑क्तम् ॥ जा॒तः । यत् । अ॒ग्ने । भुव॑ना । व्य॒ख्य इति॑

वि – अ॒ख्यः । प॒शुम् । न । गो॒पा इति॑ गो – पाः । इ॒र्यः ।

परि॑ज्मेति परि – ज्मा ॥ वैश्वा॑नर । ब्रह्म॑णे । वि॒न्द । गा॒तुम् । यू॒यम् ।

पा॒त । स्व॒स्तिभि॑रिति स्व॒स्ति – भिः । सदा॑ । नः ॥ त्वम् । अ॒ग्ने ।

शो॒चिषा॑ । शो॒शुचा॑नः । एति॑ । रोद॑सी इति॑ । अपृ॒णाः । जा॑यमानः ॥

त्वम् । दे॒वान् । अ॒भि॒शस्ते॑रित्य॒भि – श॒स्तेः । अ॒मुञ्चः॑ । वैश्वा॑नर ।

जा॒तवे॑द इति॑ जा॒त – वे॒दः । म॒हित्वे॑ति म॒हि – त्वा ॥ अ॒स्माक॑म् ।

अ॒ग्ने॒ । म॒घव॒त्स्वि॒ति म॒घव॒त् – सु॒ । धा॒रय॒ । अ॒नामि॒ । क्ष॒त्रम् ।
अ॒ज॒रम् । सु॒वी॒र्य॒मि॒ति सु॒ – वी॒र्य॒म् ॥ व॒यम् । ज॒ये॒म् । श॒ति॒नम् ।
स॒ह॒स्रि॒णम् । वै॒श्वान॒र । 48 (50)

TS 1.5.11.3

वा॒जम॒ग्ने तवो॒तिभिः॑ ॥
वै॒श्वान॒रस्य॑ सु॒म॒तौ स्या॒म रा॒जा हि॒कं भु॒वना॒ना-म॒भि॒श्रीः ।
इ॒तो जा॒तो वि॒श्वमि॒दं वि॒ च॒ष्टे वै॒श्वान॒रो य॒त॒ते सूर्ये॑ण ॥
अ॒व ते॑ हे॒डो व॒रुण॑ नमो॒भिर॒व य॒ज्ञेभि॒रीम॒हे ह॒वि॒र्भिः ।
क्ष॒य॒न्न॒स्मभ्य॑म॒सुर प्र॒चे॒तो रा॒ज॒न्नेना॑सि शि॒श्रथः॑ कृ॒तानि॑ ॥
उ॒दु॒त्त॒मं व॒रुण॑ पा॒शम॒स्मद॒वाऽध॒मं वि॒मद्ध्य॑म॒ श्र॒थाय॑ ।
अ॒था व॒यमा॑दि॒त्य – [] 49

TS 1.5.11.3 (Padam)

वा॒जम् । अ॒ग्ने । त॒व । ऊ॒तिभि॒रित्यू॒ति – भिः॑ ॥ वै॒श्वान॒रस्य॑ ।
सु॒म॒तावि॒ति सु॒ – म॒तौ । स्या॒म । रा॒जा । हि॒कम् । भु॒वना॒नाम् ।
अ॒भि॒श्री॒रित्यू॒भि – श्रीः॑ ॥ इ॒तः । जा॒तः । वि॒श्वम् । इ॒दम् ।
वी॒ति । च॒ष्टे । वै॒श्वान॒रः । य॒त॒ते । सूर्ये॑ण ॥ अ॒वे॒ति । ते॒ । हे॒डः ।

वरुण । नमोभिरिति नमः – भिः । अवेति । यज्ञेभिः । ईमहे ।
हविर्भिरिति हविः – भिः ॥ क्षयन् । अस्मभ्यमित्यस्म – भ्यम् ।
असुर । प्रचेत इति प्र – चेतः । राजन् । एनाँसि । शिश्रथः ।
कृतानि ॥ उदिति । उत्तममित्युत् – तमम् । वरुण । पाशम् ।
अस्मत् । अवेति । अधमम् । वीति । मद्ध्यमम् । श्रथाय ॥ अथ ।

वयम् । आदित्य । 49 (50)

TS 1.5.11.4

व्रते तवाऽनागसो अदितये स्याम ॥
दधिक्राव्णो अकारिषं जिष्णोरश्वस्य वाजिनः ॥
सुरभिर्नो मुखा करत् प्रण आयूँषि तारिषत् ॥
आ दधिक्राः शवसा पञ्च कृष्टीः सूर्य इव ज्योतिषाऽपस्ततान ।
सहस्रसाः शतसा वाज्यर्वा पृणक्तु मद्ध्वा समिमा वचाँसि ॥
अग्निर्मूर्द्धा भुवः ।
मरुतो यद्धवो दिवः सुम्नायन्तो हवामहे ।

आ तू न – [] 50

TS 1.5.11.4 (Padam)

व्र॒ते । तव॑ । अ॒ना॒ग॒सः । अ॒दि॒त॒ये । स्या॒म ॥ द॒धि॒क्राव्.ण्ण॑ इति॑
दधि॑ – क्राव्.ण्णः॑ । अ॒का॒रि॒षम् । जि॒ष्णोः । अ॒श्व॒स्य । वा॒जिनः॑ ॥
सु॒र॒भि । नः॑ । मु॒खा॑ ॥ क॒र॒त् । प्रेति॑ । नः॑ । आ॒यू॒षि । ता॒रि॒षत् ॥
एति॑ । द॒धि॒क्रा इति॑ दधि॑ – क्राः । श॒व॒सा । पञ्च॑ । कृ॒ष्टीः ।
सू॒र्य । इ॒व । ज्योति॑षा । अ॒पः । त॒ता॒न ॥ स॒ह॒स्र॒सा इति॑
स॒ह॒स्र – साः । श॒त॒सा इति॑ शत॑ – साः । वा॒जी । अ॒र्वा॑ ॥ पृ॒ण॒क्तु॑ ।
म॒ध्वा॑ ॥ स॒मि॒ति॑ । इ॒मा । व॒चा॒सि ॥ अ॒ग्निः । मूर्द्धा॑ । भु॒वः ॥
म॒रु॒तः । यत् । ह॒ । वः॑ । दि॒वः । सु॒म्ना॒य॒न्त इति॑ सु॒म्न – य॒न्तः ।
ह॒वा॒म॒हे ॥ एति॑ । तु । नः॑ । 50 (50)

TS 1.5.11.5

उ॒प ग॒न्त॒न ॥

या वः॑ श॒र्म श॒श॒मा॒ना॒य स॒न्ति त्रि॒धा॒तू॒नि दा॒शु॒षे य॒च्छ॒ता॒धि॑ ।
अ॒स्म॒भ्यं ता॒नि म॒रु॒तो वि॑ य॒न्त र॒यिं नो॑ ध॒त्त वृ॒षणः॑ सु॒वी॒रं ॥
अ॒दि॒ति॒र्न उ॒रु॒ष्य॒त्व॒दि॒तिः श॒र्म य॒च्छ॒तु॑ । अ॒दि॒तिः पा॒त्व॒ह॒सः ॥
म॒ही॒मू॒षु मा॒तर॑ सु॒व्र॒ता॒ना॒मृ॒त॒स्य॑ प॒त्नी॒म॒व॒से हु॒वे॒म ।

तु॒वि॒क्ष॒त्रा-म॒ज॒र॒न्ती-मु॒रू॒ची॒ꣳ सु॒श॒र्मा॒ण॒म॒दि॒ति॒ꣳ सु॒प्र॒णी॒तिं ॥
सु॒त्रा॒मा॒णं पृ॒थि॒वीं द्या॒म॒ने॒ह॒स॒ꣳ सु॒श॒र्मा॒ण() म॒दि॒ति॒ꣳ सु॒प्र॒णी॒तिं ।
दै॒वीं ना॒वꣳ स्वरि॒त्रा-म॒ना॒ग॒स-म॒स्र॒व॒न्ती॒मा रु॒हे॒मा स्व॒स्तये ॥
इ॒माꣳ सु॒ ना॒व॒माऽरु॒हꣳ श॒ता॒रि॒त्राꣳ श॒त॒स्प॒यां ।
अ॒च्छि॒द्रां पा॒रयि॒ष्णुं ॥ 51

TS 1.5.11.5 (Padam)

उ॒पे॒ति । ग॒न्त॒न ॥ या । वः । श॒र्म । श॒श॒मा॒नाय॑ । स॒न्ति । त्रि॒धा॒तू॒नी॒ति
त्रि - धा॒तू॒नि । दा॒शु॒षे ॥ य॒च्छ॒त । अ॒धि ॥ अ॒स्म॒भ्य॒मि॒त्य॒स्म-भ्य॒म् ।
ता॒नि । म॒रु॒तः । वी॒ति । य॒न्त । र॒यि॒म् । नः । ध॒त्त । वृ॒ष॒णः ।
सु॒वी॒र॒मि॒ति सु-वी॒र॒म् ॥ अ॒दि॒तिः । नः । उ॒रु॒ष्य॒तु । अ॒दि॒तिः । श॒र्म ।
य॒च्छ॒तु ॥ अ॒दि॒तिः । पा॒तु । अ॒ह॒सः ॥ म॒ही॒म् । उ । स्वि॒ति ।
मा॒तर॒म् । सु॒व्र॒ता॒ना॒मि॒ति सु - व्र॒ता॒ना॒म् । ऋ॒त॒स्य॑ । प॒त्नी॒म् । अ॒व॒से ।
हु॒वे॒म ॥ तु॒वि॒क्ष॒त्रा॒मि॒ति तु॒वि - क्ष॒त्रा॒म् । अ॒ज॒र॒न्ती॒म् । उ॒रू॒ची॒म् ।
सु॒श॒र्मा॒ण॒मि॒ति सु - श॒र्मा॒ण॒म् । अ॒दि॒ति॒म् ।
सु॒प्र॒णी॒ति॒मि॒ति सु - प्र॒णी॒ति॒म् ॥ सु॒त्रा॒मा॒ण॒मि॒ति सु - त्रा॒मा॒ण॒म् ।

पृ॒थि॒वीम् । द्याम् । अ॒ने॒ह॒सम् । सु॒शर्मा॑ण॒मि॒ति सु – शर्मा॑णम् () ।
अदि॑तिम् । सु॒प्र॒णी॒ति॒मि॒ति सु – प्र॒णी॒तिम् ॥ दै॒वीम् । ना॒वम् ।
स्व॒रि॒त्रा॒मि॒ति सु – अ॒रि॒त्रा॒म् । अ॒ना॒ग॒सम् । अ॒स्र॒व॒न्ती॒म् । ए॒ति ।
रु॒हे॒म । स्व॒स्तये॑ ॥ इ॒माम् । स्वि॒ति । ना॒वम् । ए॒ति । अ॒रु॒हम् ।
श॒ता॒रि॒त्रा॒मि॒ति श॒त – अ॒रि॒त्रा॒म् । श॒त॒स्प॒या॒मि॒ति श॒त – स्प॒या॒म् ॥
अ॒च्छि॒द्राम् । पा॒र॒यि॒ष्णुम् ॥ 51 (69)

(दि॒वा स॒-स॒ह॒स्रि॒णं वै॒श्वान॑रा॒-दि॒त्य- तू नो॒-ऽने॒ह॒सꣳ सु॒शर्मा॑ण॒-
मे॒का॒न्न॒विꣳश॒तिश्च॑) (A11)

=====

Prasna Korvai with starting Padams of 1 to 11 Anuvaakams :-

(दे॒वा॒सु॒राः-प॒रा-भू॒मि-भू॒मि-रु॒प॒प्र॒य॒न्तः-सं प॒श्या-म्य॒य॒ज्ञः-
सं प॒श्या-म्य॒ग्नि॒हो॒त्रं-म॒म ना॒म-वै॒श्वान॒र-ए॒का॒द॒श) ।

Korvai with starting Padams of 1, 11, 21 Series of Panchaatis :-

(दे॒वा॒सु॒राः-कु॒ब्धः-सं प॒श्या॒मि-सं प॒श्या॒मि-न॒क्त-मु॒प॒ग॒न्त-
नै॒क॒प॒ञ्चा॒शत्)

First and Last Padam of Fifth Prasnam :-

(दे॒वा॒सु॒राः-पा॒र॒यि॒ष्णुं)

॥ हरिः ओं ॥

॥ कृष्ण यजुर्वेदीय तैत्तिरीय संहिता पद पाठे प्रथमकाण्डे पञ्चमः

प्रश्नः समाप्तः ॥

Details of Panchati and Padam for Kandam 1, Prasanam 5 – (TS 1.5)

	Panchati	Padams
Anuvakam 1	4	225
Anuvakam 2	5	236
Anuvakam 3	3	163
Anuvakam 4	4	225
Anuvakam 5	4	217
Anuvakam 6	4	229
Anuvakam 7	6	316
Anuvakam 8	5	279
Anuvakam 9	7	363
Anuvakam 10	4	195
Anuvakam 11	5	269
Total →	51	2717